



海粟集序



詩之道難言矣古詩人無不深於學學至而不斲於言必情與境會而始言亦不斲其盡工遇其獨詣往往人莫能及無他爲之自我非借美於他人也而今之詩人惟陳言之是效浮辭僞體桎梏其天倪即工亦他人之面目於己何與焉往予與綸霞蛟門實菴同官禁庭以詩文相砥礪是時漁洋先生在郎署相率從遊是正時聞緒論益知詩道之難予輩時時講說深痛俗學之虐且襲而推論宋之作去如廬陵眉山放翁石湖輩皆卓然自立成一家言蓋以橫曲士之見聞使歸其過於倡

導之漁洋先生夫有裒有禰則有學有不學是乃世人  
之學耳豈論詩者遡流躬源之意哉比予南還多病目  
昏不能視細書戶外所投行卷不能讀索之序亦不應  
當世知其病且老也而恕之一日兒子瀛自虞山歸持  
一箒書七律二甚新而雅喜其不同乎時之作也而識  
顧君之姓名未幾攜所爲海粟集者來謁予旣愛君詩  
引眼鏡而讀之竟其近體時入乎西崑而清思逸韻不  
爲浮豔至五七古又春容演迤近乎歐梅之作其才可  
謂美而其學可謂勤矣予何以資君哉請循師友之緒  
言而進君以與古爲徒可乎古之作者三百篇漢魏以

下無弗學也當命筆時不甘自處古人後舍凡近以求  
高遠思窮路絕而後妙悟忽臻清機徐引平時之所涵  
濡醞釀者靡不輻湊於行墨而舒寫其襟期雖穠纖高  
下各有所成就使一世之人與後世之人望而知之曰  
是某人之作也何今何古天壤之間有我矣不爲虛生  
矣夫學唐非我也學宋者豈即我乎君其以古自處矣  
抑君之以海粟名其詩也蓋自比於滄海之一粟何自  
視之小邪且夫文章之光氣炳於日星其雄傑峙乎嵩  
岱固無關於窮達也口非時命所能制也即溟渤可收  
之硯勺而蓬壺可磊於盆池爾矣虞山之前輩曰宗伯

錢先生其論詩也苛其自爲言也足門牆士多從馮氏學在鄉邦且然求如韓氏蘇氏同時之崛起而聲施後世者無一人焉予以爲君之才當自名家而進之於古欲使千百世後知與予同時者之有是人也

康熙丙子九月旣望江陰曹禾序

仲雍山人顧雪坡者江左之詩人也余久聞其名而未得見其在燕邸時詢之張超然蓋落拓不羈狂吟痛飲縱情自適時號大癡者也不僅以詩名兼工書畫尤長于竹石噫何其能之多也後余寓居常熟先輩風雅渺不可追問所謂仲雍山人者已爲古人矣善人君子難得易失誠可惜也至求其所爲詩亦不可多得意其老成凋謝而詩亦隨之散失歸于泯滅邪己酉夏五其從子文寧攜其海粟詩草示余且屬爲之序向之欲得見而不能者今無心遇之求之十餘年而不可得者今一旦遇之何其幸也觀其爲詩格高調逸趣遠情深語

由宵臆獨具氣骨狀難寫之景于目前寓無盡之意于  
言表所謂讀書破萬卷下筆如有神者也使其在天祿  
石渠之間作為雅頌薦之于清廟明堂以發揚重熙累  
洽之盛顧不偉歟奈何所遇不偶其落拓不羈之才徒  
消磨于翰墨之場以爭其名于後世其中必有大不得  
已者也然所遇既如此矣雖不欲縱情自適其可得乎  
余之親友姓名見于詩集者汪東山錢崑華張超然孫  
麗明邵青門今皆次第下世而余與孫陶菴頽然獨存  
當不勝遲暮之悲矣惟是平生慕雪坡之為人雖不得  
見今讀其詩如見其人焉如承其教焉且得敘其詩他

日雪坡之詩必傳余亦因之以傳又余之幸也先大宗  
伯詩集尚未問世而文寧能于其世父惓惓不已是余  
有愧于文寧也已黃岡王材任撰

題海粟集

顧子者何人當世狂男兒髮白將五十集得一卷詩登  
臨山水間嘯傲風月時有酒即大醉得句輒書之篇篇  
律法細句句文字奇不作廊廟歌云是騷人辭寫出肝  
膽語願得知已知不得知已知甘受他人嗤余亦君之  
徒罔罔將何為讀君海粟詩捐我身世悲同里蔣廷錫

海粟集目錄

第一卷

古今體詩七十八首

第二卷

古今體詩七十九首

第三卷

古今體詩一百首

第四卷

今體詩一百一十一首

第五卷

古今體詩七十七首

第六卷 拾遺

古今體詩一百二十八首 附詩餘二首

先世父雪坡先生海粟詩藁先大人嘗欲付  
梓問世未果以歿易簣時呼榮而授之曰而  
父少時以大父命受業於而世父而世父  
客死無子是詩之刻以傳固予責也今余不  
幸且死是刻詩又而之責矣而可不成而父  
之志乎榮涕泣受命弗敢忘廿年來榮貧病  
交迫兼之喪妻哭子孑然形影久無意於人

世而獨先人遺命時時在念竊恐羸弱殘軀  
不能長保他日付托無兒不孝之罪何以反  
命九京乎因粥家藏書畫以為刻貲而搜遺  
漏正亥豕則又馬子東白程子南山姚子俊  
求汪子思順四君子之力也嗚呼先人之志  
榮之不克成者良多而於刻詩遺命獨無廢  
墜榮之幸也夫榮之罪也夫舊稿五卷新增  
拾遺一卷合之共得往近體詩五百七十三  
首詩餘二首開雕始於己酉六月成於庚戌  
八月猶子榮再拜謹識



海粟集目錄

海粟集卷第一

少年行

白面郎君喜俠遊黃衫寶玦佩吳鉤千金買得如花女  
笑與蠻奴換紫騮

淮陰釣臺歌

淮陰之水湯湯流釣臺木落驚高秋當時暴秦方失鹿  
楚漢分兵共追逐韓侯未展蓋世才寄食竟為漂母哀  
一朝忍取跨下辱魚竿引出真龍來旌旗已定漢日月  
劍上淋漓秦項血戰功收後獻山河鐘傳長樂悲風咽

仲雍山人顧

文淵

雪坡



功高自古君疑臣  
削生私說非無因  
英雄結局每如此  
莫道魚竿賺得人

露筋祠

湖濱日落芙蓉醉  
豹脚花蚊闕成市  
壯夫遭之猶失聲  
蛾眉弱質如何避  
避時只限草莽中  
暮夜畏處嫌疑地  
姑死留嫂生棄一  
竄身乖大義平明  
相見皁白兮涕淚  
何顏浣露筋有口  
千秋開不得至今  
石闕銜碑文

促織吟二首

促織聲唧唧寒女  
當窗織愁絲上得  
機梭子如何擲  
促織復促織竟夜  
鳴不息千丈許愁  
絲織殺那成匹

驅蝗詞

山田早稻憂殘暑  
蝗飛陣陣來何許  
叢祠老巫欺里氓  
佯以杯玦身傴僂  
曰此蟲神能主興  
神弭災非輕侮東  
滕西壠請巡徧急  
整旗繖添簫鼓神  
之靈威且武獻紙  
錢陳酒脯老巫歌  
小巫舞豈知賽罷  
神進祠蔽天蝗又  
如風雨里氓望稻  
空頓足爛醉老巫  
無一語

瑜伽曲

靈巖寺觀  
燄口作

陰風旋轉多羅樹  
梵咒未譯唐音語  
口吹碧火上寶幡  
鐵圍餓鬼紛然聚  
法王妙諦不可量  
萬古恩讐空爾汝  
楊枝灑露黑業銷  
塔鈴響斷飛秋雨

牧牛詞

朝牧牛草露收暮牧牛草烟浮羣兒叫嘯上牛背南隴  
東原各分隊道旁息蔭少惡木日午飲水多清澮牛牛  
相望牟然鳴牧笛互荅風前聲兩邊水草已充腹各各  
歸邨路岐熟角彎環尾秃速春犁整頓待汝畊莫負樹  
梢鳴布穀

樵客吟

山深松櫪密作林樵客礪斧爭搜尋崎嶇路遠北風起  
吹汝毛髮寒森森扳藤跨澗上危磴前樵相呼後樵應  
斧聲丁丁響空谷枝幹伐多猶半剩束成大擔各忙挑

怕遇猛虎歸心焦采樵客爲汝惜松櫪經冬伐不完何  
須蹈險謀衣食

漁家竹枝歌六首

平湖萬頃產魚蝦箇箇漁舟穩寄家便起水租容易辦  
譬如陸地種桑麻

風風雨雨不關心魚鼈空專窟宅深撒網挺叉俱慣習  
算來淘水勝淘金

餅罄不憂無酒換釜空翻喜有菱炊踞將篷背弄橫笛  
吹出漁家新竹枝

船尾船頭挂網腥日烘蓼渚舞蜻蜓大兒新斲釣竿紫

小婦細織蓑衣青

月上湖梢集衆船團圍暢飲不論錢蟹拾巨螯茭草縛  
編尋縮項柳條穿

不藉畊桑衣食週生涯只在荻蘆洲由來省識生離苦  
風水鴛鴦到白頭

苦節吟

黃圭菴  
屬作

吳江老嫠真苦節自小深閨慕貞潔可憐十五嫁良人  
月兩團圓遽長別雙棲黃鵠成單影悲風吹多山竹裂  
年復年兮茹冰蘖菱花塵暗斑斑血泉臺未曉會期遙  
松柏千秋誓同穴

憂麥行

戊寅

大麥小麥本備荒穗頭四月抽長芒欲求顆顆無秕粒  
祇要少雨多晴暘今春雨暘輒相反二麥大半先萎黃  
可憐農夫貧徹骨日望麥熟醫飢瘡安得老天賜乾燥  
留與斗碩登上場措撐飯鍋活性命庠水滿田爭插秧

回鑾奏凱歌九章

龍輿出闕擁旌旂元戎受命乘先機長驅絕漠勵將士  
不用露布宣天威

軍儲供給餼糧均運載絡繹車千輪貔貅百萬率奮力  
策功分寸酬皇仁

海東集卷一  
賀蘭山邊雪花颺朔風捲地河聲壯 天言慰勞溫如  
春頓使六軍忘挾纊

逆徒跋扈無寧歲敢向邊圉輕睥睨 天戈一動遂蕩  
滅立石銘功昭萬世

陣前太白收光芒黑水風息天山蒼遺黎感化懽動地  
大哉 聖德超虞唐

皇澤所被元氣調靈泉湧地草茁茁六軍稽首呼 萬  
歲駝馬蕃息齊生臙

騎軍簫鏡奏凱樂驟降甘霖洗刀稍遐荒絕域混一區  
永順天心奉正朔

回鑿日耀龍旂高干戈載戢弓矢橐百僚文武敢拜爵

至尊無上謙勲勞

廟庭獻俘告成績舞以象功歌咏德年成物阜永昇平  
萬歲千秋享無極

玻黎花罌歌

蕃客慕我墨竹名捧送兩篋玻黎罌開時光彩炫人目  
疑是堅冰鐫鏤成細看表裏殊皎潔洞照毫髮踰水精  
擬寫琅玕報其意案頭留此聊娛情不將貯酒試養花  
注以勺水中空明可意時花巧位置透漏嫩葉分纖莖  
花香露浥添馥郁花骨寒沁憐嬌嬰終朝對之翫不足

使我詩思冷然清無花之時即歸篋屢觸指爪聲琤琤  
憐渠脆質入中國踰十萬里波濤程傳聞外洋此爲寶  
却賤蜜器加嘲評詩題畫首請捲去未識與竹孰重輕  
爲語花嬰亦珍重花枝插得真縱橫

江邨行

江頭未落紫楝花清和天氣無風沙農忙正當插時候  
桔槔引水爭咿啞秧苗綠潑一種色小燕斜飛接蟲食  
東舍西家麥上場隔巷連耜聲拍拍我來此地曾繫船  
景象似勝三年前土垣缺處窺婦女日晏竹裏縈炊烟  
誰知官家念逋賦枉赦胥吏侵欺錢

送春次江葭渚韻

邈矣難追過去春熏風狼籍更愁人驢行荷散青錢大  
傳恨蕉緘綠紙新宿酒不嫌衣上跡豔歌空惜扇中塵  
多情留得荼蘼在壓架濃香尚未貧

西林納涼

百圍樹覆涼於水十笏軒開大似船雲子飯沾菹鉢供  
月團茶就竹爐煎竟成習靜逃禪地渾忘銷金爍石天  
客慣幸辭朝襪襪臨歸風袂覺冷然

促織

高田如雪採棉花夜作辛勤動紡車莫怪露蟲先促織

燈前機杼不多家

破山方丈與雪礪和尚茶話紀事五首

空山又見鹿園春  
曲徑迴廊樹色新  
四十年前成影事  
各寮耆舊竟無人

法門兄弟固多才  
孤掌能鳴亦異哉  
纔轉願輪興土木

珠林紺殿煥然開

大雄殿垂六十年未經修葺幾至傾圮師能一力主之布施雲委歲餘竣工希有事也

御書梵夾繞龍光  
詔賜江南各寺藏  
深幸此山霑 聖

澤流傳萬世作津梁

敬閱 今上詔賜御書金剛經

半生碌碌世緣深  
投老追思每痛心  
一語便令余起舞

分明妙指發琴音

問陳瑩中疑金剛泥人公案師為點撥默契其旨

詩家習氣未能拋  
磨得隄糜溢硯坳  
茶罷移燈題寺壁  
不知殘月挂梅梢

牆凹樹

西舍牆凹樹十尋  
曾經雷火透中心  
枝柯未朽藤蘿活  
憑仗春風借綠陰

放鯉

桃花雨後水奔渾  
赤鯉揚鬚謾感恩  
不是金鱗三十六  
也應放汝上龍門

金東阿送筍二首

紫箨爛斑裹竹孫  
籠盛數束到柴門  
煮時尚帶烟霞氣

只惜龍材一旦髮  
此君風味得頻沾中饋  
葷腥未免嫌每到臨餐  
慚下箸琅玕充腹太傷廉

憶緯乾弟窗前新竹

知爾窗西竹龍孫又遍生  
精神原自異頭角嶄然成  
薄霧濡青籜熏風脫錦綳  
一林煩護好借此行清名

菖蒲石供

菖蒲產名山衆草莫與若  
其類九節者得充上品藥  
抽葉如針芒青青滿礪壑  
有如遁世士無悶甘寂莫  
又如辟穀人無疾羸瘦削  
一朝遇知己風味委咀嚼  
分歸種

盆山石竅根荻絡春霖取潤澤  
夏日避炎燄清喜秋露濡  
寒慎冬雪淪橫陳几案旁  
政爾得所托療我觀書眼  
衰齡散昏膜毋使爐烟繞  
休令燈燼落珍重謹護持  
并與家人約待伊花開時  
移置餐霞閣

感秋荅緯乾二弟

梧颺葉初零炎威斂其酷  
運行倏已秋中抱能無觸  
橫琴奏宮羽絃急由軫促  
人生胡不樂坐令自拘束  
百年今過半壯去老相續  
林蟬嘒嘒鳴庭草荒荒綠  
玩物爲愀然咏茲酬所勗

安貧老縫掖素懷見諸詩  
豈無干祿懷怒焉苦調飢藜



藿足以飽志尚非輕移鸞翮不終鍛驥心寧受羈丈夫  
會有念時至名自馳勿謂踐衰境未遇且俟之

冬初庭仙張子再赴萊陽幕臨行出觀海圖屬

題次蔣星來韻

東萊太守召吾子首冬別我帆江水越江渡淮走齊魯  
半是驢鞍半蓬底袖籠一卷觀海圖展開滿目風濤起  
蒼厓崔嵬小葉脫中貌幽人宛相似如何不攜焦尾琴  
水仙之操閑十指嘗聞萊陽有亭望三山蜃氣青紅結  
成市此行計日赴賓幕身到海濱復幾里惜無杯酒以  
餞君深愧和詩聊爾爾

題邵青門道裝小照二首

上清授籙擬登真顛也而今洵絕倫爲向酒壇傳盛事  
杯中端的出僊人

樵陽八百識龍沙烏目山中是爾家不見慧車傳道處  
數聲鸞嘯散雲霞

水田謠 己卯

南畝東區稻不多牽礮月夜喜農歌譬如生在高郵口  
濁浪中無一把禾

逋稅難將罅漏填邨邨稻挂夕陽邊西戍悔卜神祠玃  
秕穀偏生大有年

冷竈無煙日過中  
機頭小婦撥忙工  
拾歸遺穗無餘粒  
暮雀啾啾噪棘叢

蘆笆壁破北風鑽  
補得新泥凍未乾  
月出柳灣天作冷  
疲牛引犢始歸欄

寒瓜摘盡留枯蔓  
苦菜挑來半塌窠  
數米和炊措過日  
團欒骨肉受飢多

黃昏風聒起林鴉  
破屋門將木椽叉  
那得篝燈供夜作  
辟纊織屨亦生涯

奉送汪東山進士殿試

嘉平月朔天氣和  
送君勸酌金叵羅  
園梅早占百花上

已兆結實調羹多  
君之此行就殿試  
結束琴書整行

李一帆晨興挂城南  
計程水陸三千里  
首途曠覽渡大

江不妨風雪開船窗  
自從翠華南幸後  
金焦景色真無

雙由江而淮始上道  
秣君騎兮膏車轅  
辛勤僕從隨左

右國門半月和春到  
懸知對策蓬萊宮  
彤墀羅列多英

雄胸攄錦繡珠落唾  
萬言出筆飛成虹  
袞衣臨軒畫方

永簫韶九奏朝儀整  
鶴鷺班隨劔珮聲  
龍蛇風動旌旗

影詰朝喜氣溢  
聖顏鴻臚三唱蒙  
恩頒月娥老桂久

矣待一枝獨許鰲頭  
攀科名以時自超  
卓不負十年揣

摩學余守山林日翹  
首先爲吉語情真  
確行將身作玉

堂僊內署無忘孟浩然萬一相留逢帝主白頭僥倖奏  
詩篇

吳墨井秉泰西教於膠川有六十吟寄示敬倚

原韻

西學闢館巧莫過其為結構多用磚石沙灰少用木柱板壁防火患也為問敷教夫如何

僉曰彼國進脩士考選出入如機梭西士自幼入會矢志不婚宦經考選者先進文科復

進格物窮理之學始進天學科若優取乃許中國敷教名成持節上海舶大洋歷險鬚為皤

魚龍風雨赤黑道驚怪詫異三年多地中海有騰空飛魚有大魚從角中噴水能覆舟其性嗜

油酒又有禽鳥恒浮宿海面又有魚似人似牛馬豬犬之類者離程九萬有何羨泰西距中國九萬里所冀中

邦邀寵眷少持筐篚貢大廷世運隆平珍貨賤前朝萬曆九年辛巳

利瑪竇始見朝進耶蘇聖像西琴白鳴鐘等於大內生賜餼稟沒賜葬地明末利類思安文思入中土至本朝世祖章皇帝賜宇焚脩給膳秦養及南懷仁畱心曆學名入都賜養光祿寺

聖恩寬大柔遠人優養俾伊沒無怨其為文

字傳象胥彼國之風洞然見吾曹碌碌昧物欲墨井吳

生稱疾足授其大要際天人那歎衰遲悲歲促臯比一

席食彼俸中邦脩士主其席者例食泰西俸字母筆法瀾翻熟泰西以二十三字母為主當三十二筆法

以三十二筆法互相配合則成人物之名目提掇學徒遵聖經仁義禮智信稍拂規範為恥

辱門庭不傍佛與仙操勵今踰耳順年仰瞻高峻真卓

立俯視鹵莽殊相懸何時鼓棹過膠水請發所采先知

篇神遊歐羅巴一度大西洋彼云歐羅巴使我開拓胸中天

汪郎菽蘭歌

春蘭托根在空谷不以無人苦幽獨豈知好事有汪郎  
菟羅殆遍芬芳族十百其盆列廣庭風梳雨沐叢叢青  
勾芒肇政甫旬日疏出屈子離騷經昨置齋中天放霽  
恰值羣花爭吐氣纖莖嫩蕊相映發或間同心與聯蒂  
一時爲之意悠然草中定合稱臞仙清疑吸過楚畹露  
潤豈染著湘山烟橫陳四隅殊窈窕旣凝睇兮又含笑  
以時調護情性適軒窗况隔春寒峭嘗聞自古多異香  
鬱金艾蒨及都梁僅供博山爐中用雲篆罨藹熏衣裳  
此香鄭重號王者肯伍衆草淪於野贈之聲歌愧非雅  
請絙朱弦對蘭寫

錦峯春遊四首

一路春光助塵談水窗晴漾穀文藍商量閒處停烏榜  
楊柳橋將過第三

春當臨去故餘濃陌柳園花望裏重擁出烟鬟落湖面  
錦峯渾似美人峯

多情鶯燕屢勾留擬揀花枝替酒籌驀地香來襟蘭麝  
翠簾斜揭未迴舟

膽瓶芍藥賸薦紅詭贈當年陋鄭風簞取蠻牋吟麗句  
不防聲落綺窗中

榴花

嘉種來從漢使槎年年五月鬪葵花枝頭亂灑猩肌血  
恰傍南窗六扇紗

銷夏詩五首

三旬堪避暑菴宇寄城東簟爽蕉遮日衣涼竹瀉風味  
酣黃妳後境落黑甜中何必通禪理心源已覺空  
解得貧而樂簞瓢道自孤子身慵檢點晚計省枝梧世  
任淄澠混人憑牛馬呼山林疎散者誰不是吾徒  
故人同研席轉盼廿年餘宦橐誰分俸郵程枉遞書蓬  
蒿新徑曲風雨舊軒除貴賤雲泥隔何須歎索居  
銷夏惟山北炎天闢境清寺深交樹蔭橋狹撼溪聲稱

脚梭鞋軟過眉竹杖輕相留每忘返塵慮了無攪  
久不聞朝報蕭然野史亭流年雙鬢白舊物一瓊青結  
陣槐根蟻爭輝草際螢靜中叅物理實稱掩柴扃

題日本人畫鷹

架上蒼鷹整羽毛曾經萬里冒風濤攫身定是思狐兔  
安得倭兒爲解縲

贈胡斌菴

孝友名無匹吾曹每念君秋園披菊露壽藏掃松雲慘  
淡吟懷見蒼茫畫思分

馬雲房畫桐  
圃壽藏圖

再觀貞逸議掩卷慟斯

文尊甫貞逸私謚議余姻家蔣  
心齋撰兩翁相繼而歿故云

旅次喜晤黃虞道士方望子

吳閩旅次晤方干杯酒論詩再罄歡異地菊花佳節近

昨朝風色大江寒君自儀真渡江到吳門貂裘敝後何妨衲鶴髮稀來

遂不冠家在黃山歸思動奇峯六六望雲端

題心齋蔣公遺照

詩名老去冠三吳八十餘齡却杖扶誰料少微星黯淡

空留精爽托斯圖

留題姜仲子學在虎丘別業五絕

冰霜凜冽二姜祠門掩疎林鶴磻滑十日兩回尋仲子

今朝蒙贈八分碑尊甫貞毅先生赴戍宣州詩及于頔撰二姜先生碑俱谷口鄭籃八分

秋深木葉雨痕斑行客經過每動顏雲護一樓藏諫草

英靈却戀敬亭山貞毅先生於癸丑疾作歿於吳門遺命葬敬亭山以先朝遣戍之地也

昔聆正論座生寒壬寅春遇貞毅先生於花山藥師方丈聲效如昨故云水剩山殘節槩完

畫幅幸瞻袍笏像嚴然侃侃立朝端仲子所繪

木主俄驚設此堂藥師木主以明末與貞毅先生面糾輔臣同事故特設此摳衣瞻禮缺心香

頓教清淚承雙睫少日曾參弟子行師主三峯時命余名曰道毅字曰熟稼

古玩紛紛洗眼昏時閱宋克草隸孝陵殿瓦靈壁供石赤烏石鼎其餘不暇細玩木樨香裏擱匏

樽時余苦頭風不多飲憑君莫話崇禎事忠孝誰家萃一門崇禎十六年萊陽被兵

祖諱某叔諱某父子率眾守城城陷死之從死者男女二十二

許照遠出交趾劔索題書贈

許子藏蕃劍開看炫醉眸一條冰刃直三尺電光流自  
助英雄氣休論細碎讎衛身猶健僕何怯遠行遊

重陽日雨懷胡士及北行兼寄汪東山翰撰同

胡紫鄰韻

佳節無人送酒過題糕詩興亦蹉跎寒侵籬菊秋容淡  
雲壓江楓雨意多旅客計程臨象闕詞臣應制在鑿坡  
緘書未即憑郵寄其奈三千遠路何

楓葉

散步城西日未斜霜酣楓葉影交加引人直抵三橋路  
炫眼穠于二月花鹿竄山坳疑野燒鴈鳴湖口訝晴霞

年年青女工粧點半屬僧坊半酒家

海粟集卷第一

海粟集卷第二

仲雍山人顧

文淵

雪坡

秦駐山望海四首

秦駐山高拔海邊萬雷齊作浪轟闐百川納盡難爲水  
六合窮來只限天風靜魚龍翻落日夜深星斗混荒煙  
一從翠輦東巡後誰說蓬萊尚有仙

縱目窮荒八裔清振衣絕壁使人驚排空飛沫連沙積  
出谷衝風與浪爭雨歇層樓凝蜃氣潮迴疊鼓送鼉聲  
每嗤精衛徒銜石未見揚塵豈得平

捲盡黃塵滓穢開狂瀾倒撼衆山隈地維果是東南缺

三  
七  
二



潮信能分朔望來，腰眇扶桑騰日馭。蒼茫赤縣沒雲堆，  
若逢斥鹵成膏土。秭稌頻年漫勸栽。

蘋末風生氣色新，胚渾纔判霧開晨。龍堂珠滿猶藏月，  
鮫室綃多幾贈人。萬穴波濤浮作國，十洲花木別生春。  
釣魚雅慕任公志，未暇投竿寂寞濱。

題海昌李夫人畫枯木慈烏

冰霜刻轢枝葉枯，凍翮拍拍棲慈烏。杜鵑生知君臣體，  
此鳥孝養何曾殊。子生八九能反哺，東飛西宿聲相呼。  
我初見之五內裂，雁行兄弟俱丈夫。空餘志願存區區，  
力農不成成腐儒。高堂二親髮已白，菽水不給晨與晡。  
奈何謀食各趨走，人不如鳥何爲乎。吁嗟海昌夫人有  
深義，不然豈肯屑屑圖斯圖。

讀夫山語錄題卷尾

東南法席賴撐持，天下禪林仰導師。若與曹溪論正脉，  
應書第一中興碑。

漫興二首

就飲花時豈待招，流鶯聲裏過溪橋。不知誰捲風鳶線，  
揉損鶯黃柳數條。

花枝礙路未開齊，步步青蕪雨夾泥。兩月陰晴莫憑準，  
竹林多事鶉鴉啼。

海峽集卷一  
上巳日馮鈍吟詩老在過小樓留酌即事  
早是城東祓禊天小樓散帙興悠然談詩正擬要名宿  
扶杖煩過惜老年傍舍花枝沾細雨拂厨竹影弄晴煙  
酒闌珍重先生意更把蘭亭八法傳

茸城周生工篆學善鐫玉章贈歌

倉頡造書烟四目鬼哭啾啾天雨粟象形文字繼周秦  
鐘鼎槃盂土花感岐陽石鼓神守護嶧山之碑翻棗木  
流傳印璽爭考據收藏之家亦常畜或遭劫火混灰燼  
或墮水底淪魚腹大凡好物每不幸良桐供爨劍埋獄  
茸城周生工六書寸鐵能抉于闐玉晴窗羅列古紐印

獸走蟲旋與龜伏篆文運筆按撫窮奇崛形模動驚俗  
鬱若蒼壑蛟龍蟠森如武庫戈矛矗刻時深喜獲飽觀  
迴顧周生還勉勗有藝如斯豈貧賤莫謂世道多翻覆  
但經識者一贊揚頓似鄒律噓寒谷自今且致學業深  
請攷歐陽金石錄

秦淮水榭四首次周櫟園侍郎原韻

秦淮依舊接青溪六代繁華跡已迷海燕尚餘華屋夢  
林鳥仍傍故宮啼靡蕪綠襯金沙軟楊柳陰齊水檻低  
吾有閒情欲消遣漫聽哀笛夕陽西  
兩岸樓臺映落霞伊涼按譜感箏琶佳人久絕金蓮步

海東集卷一  
舊曲誰翻玉樹花竹掩古屏微見畫蘭燒殘燭半籠紗  
多情最是中流月可奈垂垂柳帶遮

十二闌干面水開鸞簫象板重徘徊縱拚江令題詩去  
漫遣周郎顧曲來桐葉露生涼月榭荷花香薦曉風杯  
何當共駕扁舟去兩槩秦淮泛百迴

忼爽情懷不自持離家幾日却傷離月當酒散添重暈  
雲爲歌殘裊一絲舉目山痕銷翠黛沾衣花淚凝燕支  
客中值此無端景觸撥愁根豈合宜

南市

緩策疲驢南市遊鍾山月色動人愁蕭辰重理繁華夢

覓遍金陵十四樓

自象山詣蓮花峯中途冒大風雨止宿僧舍

肩輿轉上沙路狹桑竹礙行僅六七里盤旋雲內外山  
南飛霹靂水氣混圓蓋失我翠芙蓉白日變幽晦俄頃  
雨翻盆步步漲湍瀨積苔滑難涉萬流響砰湃怪樹雷  
劈斷崩沙溜衝壞抵暮天放晴月輪照松檜投寺燎濕  
衣銷寒酒添債無端歷危險轉奉垂堂戒

賀九嶺踏月歌

危崖拔地層層綠白道如絲盤百曲瘦筇觸爪鏗有聲  
走遍千峯猶不足僧言月出境始異且把長鑱掘黃獨

海東集卷二  
劃然一嘯草木動下視雲氣無餘族梵宮金碧麗秋眸  
銀光迸出蟾蜍腹恨不攜壺石凍春醉倒松根留信宿

丹井梅花歌

老梅百樹環山房風饕雪虐精神強虬蟠幹若舞脫腕  
莓苔剝蝕紛青蒼緣知培養非獨造化力旁有仙翁之  
井泉脉中涵藏年年歲歲迸糞蘖雲液流甘流不竭石  
碱丹砂應尚存暗與花神換凡骨以茲天然足風韻衆  
卉共遜居高潔勾芒肇政頃刻花豈許桃杏爲同列自  
從托根于層巔曾無樵採來夤緣枝枝上竦攢素萼披  
拂叢篁密處欲隨危厓邊昏黃月出香浮動薄霧霏微

捲楹棟林畔分明縞袂人酒酣詫入羅浮夢夜深燒燭  
杯再行題詩頗覺才縱橫何水部宋廣平奚爲二子獨  
擅千載名金壺墨汁儘揮灑梅花聲價肯使輕

鶴洲草堂次周青士韻留贈主人

橋東何地可閒遊最是南湖放鶴洲極目湖波環勝壤  
傷心春色滿危樓迎風拂戶梨花冷迸蘚穿階竹筍稠  
敢把此詩留素壁緣知太守擅風流

暮春武林吳緒思同過指月菴次周青士韻四

首

聽徹催歸鳥春風欲盡時竹林皆把臂蓮社肯攢眉所

踐惟詩約難忘是酒期風流欣不替湖海得新知  
異地忘爲客精藍亦是家僧鑿雷後筍客焙火前茶目  
送鴉歸樹軒明水漾霞一塵真不染令我發心花  
皎皎當眉月湯湯濯足流此心歸淨業隨處泛虛舟投  
宿林垂暝懷鄉麥有秋長廊新粉壁不惜畫滄洲  
素性耽蕭寂風塵意不關詩多嫌熟境客久變蒼顏出  
岫雲無定棲松鶴自閒未妨眠一覺夢穩到家山

題華義逸古松

虬枝蒼鬣駭真松得自梁溪第幾峯畢竟毫端具靈氣  
展看猶帶濕雲蹤

題朱邠瞻畫麒麟閣功臣圖

朱生遠投梧桐鄉主人解榻留高堂酒觥激灑燈熒煌  
麒麟閣像出錦囊紙上一一傳芬芳白哲疏眉鬚鬣長  
金貂玉劔爲霍光輔正宿衛持紀綱肅敬不怠將軍張  
龍額之封繼頽當雲中萬騎威騰驤遜詞溫顏不可量  
壯侯白旄金甲黃身經百戰餘箭創年八九十平氐羌  
料敵制勝謀靡亢丙魏兩相居廟廊孝宣中興日月光  
豸冠朱纓珮鏘鏘鵠立秉笏何軒昂御史法律誰頡頏  
辭婚屏居出帝閭家駒千里洵足當天子追念自不忘  
太傅輔國誠賢良憂政納諫期成康及門者誰過京房

海東集卷二  
六  
劍隨馬驚少府梁嗟哉屬國陷邊疆節毛零落牧羝羊  
丁年奉使歸髮蒼文武濟濟排雁行材傑奮起俾熾昌  
觀君丹青史筆彰漢家故實芸編香歲時伏臘誰蒸嘗  
嗚呼近代英雄坊廟圯饗絕煙草荒山河帶礪今茫茫  
更請繪出同裝潢毋輕示人什襲藏

畫梅與凌南樓

枝如屈鐵紫苔攢剪刻冰花秀可餐莫道風前輕貌取  
因君眼力具高寒

精嚴寺

破寺由東晉山門面勢寬有時聞磬響無處覓碑看律

廢僧儀少林荒佛相寒感人如有意風葉攪成團

綠雪齋席上口占

人才真見一時雄此夜愁開酒餞中竹屋寒霜全襯白  
薪爐殘葉欲銷紅策勳共老書生業掉舌誰揚國士風  
千里雲程淹驥足驍騰志在莫言窮

瀕行荅柏嶷山韻

世俗紛紛各炫奇吾曹須以古人師風霜未免爲形累  
草莽徒嫌得路遲醉過菊花僧舍酒書殘柿葉客程詩  
不堪遂作東西別衰柳寒江兩地思

丹陽馬上所見

海東集卷二  
城頭斂星芒。簾篋聲何悲。遊子苦行邁。整鞍車載脂。始  
由南徐界。凜冽西風吹。離城悉曠野。枯楊嘯愁鴟。黎毗  
屢遭旱。屋舍拆無遺。傷哉急官租。米粒從何支。麥苗早  
食盡。屑榆及其枝。大半鬻男女。哀號生別離。天應恤下  
民。降殃奚至斯。竊恐盜賊起。亦隨之。我嬾丹青手。  
欲倣鄭俠爲圖成。上京國路遠。愁淹遲。有志力不逮。行  
行空自嗤。

投宿句容旅店

漂零愁窮冬。顏色益憔悴。日落松路黑。僕夫動寒意。層  
崖鑱青冥。邃谷響林吹。何門止余宿。蹴踏心轉悸。更餘  
雨雪泥。滑恐墜地拭。眼驚四隅山。山迴然異。

句曲道上冒雪行八十里抵上元客舍是夕有  
月

弊裘非蒙茸。寒氣剝我膚。策馬馬不進。雨雪已載塗。溝  
坑膠敗葉。樵徑百草枯。橡栗採拾盡。藤梢墜飢鼯。嵩萃  
山萬重。積素開畫圖。望中喜人煙。屋舍臨通衢。乘車逢  
官長。弩矢爭前驅。少憩樹林側。市門日將晡。充腸煮脫  
粟。煖酒提葫蘆。頗能遣煩懣。境與前夕殊。早見故鄉月。  
皎潔窗東隅。歡然穩我睡。明發辭崎嶇。

過孝陵

馬毛縮如蝟西風利于箭束裝逐徒侶十里抵荒甸寒  
山矗彼蒼積雪晃人面松楸森邃谷陵寢闕遺殿石獸  
剝蒼苔壞道水穿遍真龍蛻骨去王氣無一綫尚留內  
官守俎豆以時薦神靈暗呵衛瞥眼浮雲變迴首感滄  
桑哀哀淚交濺

姑孰諸山閒土地平曠放韉行二十里不覺入

暝因紀即景

山川迎馬首歷歷引清眺藤樹互屈蟠石骨露孤峭黃  
泥陷車轍草根延野燒途長限程期倉卒盡餘焰側足  
聽冰狐卑飛宿林鷄夜行輕其身壯士刀在鞘天文斗  
宿沒暝色類荒徼轉輾念故鄉停鞭一舒嘯

采石磯懷古

層崖勢孱削據嶮古所言仰視稠木陰俯臨大江源日  
落聞鼉吼洪濤嚙其根當年謫仙人泛月傾金樽身披  
宮錦袍笑傲凌乾坤醉過二百里達曉抵白門至今讀  
其詩風流宛然存我來倚孤亭吳楚氣色昏茲夕是何  
夕明月無一痕願言傾斗酒特酹白也魂

蕪關書感

氛祲蕩未盡諸鎮尚擁旄喧傳下羽檄旦暮平賊壕豈



海東集卷二  
知東南隅曠土維莠蒿災荒迫黎庶載路聞啼號坐令  
市井閒五穀索價高此邦據要衝人烟接波濤舟車集  
關口筦榷吏所操國用苦不足算估窮織毫吾徒感中  
腸霜巔日蕭騷遭此艱虞際敢惜筋骨勞

鳩茲客舍坐雨

短褐征塵喜暫除故人供給住僧廬三更樹穩投巢鶴  
萬里風翻跋浪魚漂泊枉添羈客恨平安還阻報家書  
春來最憶滕王閣何日揚帆縱所如

時諸六在將  
蒞任南昌

客中守歲

歸意空懸十幅篷殘冬身阻給園中坐淹夜雨開樽潑

林鬧羣鴉列炬紅雄鎮喜聞烽燧息重關得有捷書通  
忍家最是天倫樂守歲杯盤恨未同

登嶧磯爲風所阻

石膚凝鐵色根插大江中路滑消殘雪船迴阻惡風草  
青歸雁渚雲黑老蛟宮寧憚波濤險明晨馬首東

過古玩鞭亭

倚酒衝寒酒復醒放韁行到玩鞭亭當年五騎追奔地  
荒草重山未了青

春日雜詩二首

惆悵秦淮醉夜闌箏琶弦上語辛酸徐孀老去風情在

曾當名花秉燭看

勞勞亭下柳誰攀  
雨葉風枝等是閒  
無限六朝文物恨  
馬頭蒼翠見鍾山

同陸覲菴過滄江讀書樓有懷莆田林協能因  
出鬪茶圖共觀悵然有作

昔年鬪茗無虛日  
今次披圖羨兩人  
一椀搜腸曾破悶  
三毛加頰果傳神  
蘭花風送吳船夜  
榕樹雲遮閩嶠春  
若使薦雄文字後  
莫忘命駕訪漁津

懷荆溪史浮叟兼詢同遊天台之約

每羨荆溪叟  
焚魚隱碧山  
夢醒天寶後  
身老義熙閒  
雨

徑修篁密風軒細  
菊斑赤城曾有約  
何日許同攀

山齋偶集次陸敕先韻

山勢平分雉堞西  
開軒嵐翠染來齊  
牙籤插架能除蠹  
松醞藏瓶始坼泥  
會面語多危苦意  
把衣痕足亂離啼  
相憐動有參辰隔  
容易孤舟別柳溪

汪碧巢新營小圃

兩版柴扉向北開  
牆匡壘石不防墮  
拖藍溪水應重浚  
屈鐵梅枝是舊栽  
風側帽簷黏蛻葉  
雲生闌角染新苔  
造門從此多車轍  
我亦尋詩得得來

元旦第二日集橙雨軒次陸敕先韻

細斟歲首傳生酒

唐人歲首飲酒名傳生

坐挹餘芬長者言能致杖藜

非俗路

薛能詩山無俗路藏高士

得容蠟屐是煙村動頭風欲催花信成

寸苔將迸竹孫共荷堯天新雨露陳荻枯枿盡沾恩

薛孝穆以餅中梅花索予寫照賦此

山邨老梅景絕奇斬新如雪攢高枝托根絕壑花口噤  
羣陰剝盡回春姿一姿誰共凍雲折清香偏沁人肝脾  
爛熳紫蘚裹鐵骨玉琢嫩蕊無瑕疵遂為好事案閒物  
對翫累日能忘疲傳神豈無林君復寫照愧非楊補之  
東風澹蕩吹硯瓦鈎花發幹移於斯羅浮美人莫可致  
參橫月落長相思

陳徵翁以予十年前所畫山水冊子裝潢精好

屬題歌行不揣鄙陋輒荅其意

十年以前頗好奇讀書少暇畫筆隨搜羅古畫索古法  
拭眼往往分駟驪人言學畫若作文天地造物皆吾師  
又言學畫若悟禪要求骨髓毋求皮初聞斯語挫銳氣  
既學愈驗言非欺乃知畫也實難事欲造闢奧終藩籬  
邇來習嬾非昔年坐令十指如懸槌閒嘗興酣放秃筆  
枯枿竹石多淋漓此冊山水舊所作恍夢初覺能尋思  
派由兩宋入元季摹倣景狀爭毫釐春陽陵谷百卉發  
夏炎森木環清漪秋霜摧葉山骨瘦冬雪攢點枯梅枝

偶從披翫竊自幸物以少貴誠有之不然此畫好何在  
尚留八案索題詩

故鄆城漫興八絕句

暖雲狼籍壓山城城外羣山面面迎  
滿耳流泉奏琴筑何須別棟樹梢鶯

帶蘚紫苞新斲筍含風青葉未條桑  
田家也解看花趣老瓦盆盛箬酒香

寺僧揖客多生面野鳥啼花不拒人  
搜得舊碑三反讀

竟忘雙屐破苔茵

清涼寺旁有趙子昂書東嶽行宮碑

踏青女伴惜春華李徑爽蹊歇鈿車  
見說惠妃生長地

不輕評泊路旁花

惠妃唐太宗才人也

陳武釣臺存巨石臨流樹影漾斜曛  
只今王氣銷磨盡

剩有從龍一片雲

釣臺去岩山里許

雨壓修篁匝徑低寺名清果傍春堤  
永懷大曆閒才子

鼓棹先過罨畫溪

清果寺為唐錢考功舊宅

金砂泉底泓澄水明月峽中爛漫花  
欲擬探奇蠟雙屐

為嘗魯望舊園茶

陸龜蒙茶園在顧渚山下

擬窮七十二峯來未到湖亭起雨雷  
勝境與人天閱惜

攀蘿捫葛歎空回

望湖亭去清涼寺里許

周荻書招同汪季青昆仲集清森館五首

佳日不辭櫻笋約相招都是會心人未妨生死鷓鴣杓  
醉卧花餘一尺茵

雨苔路曲無車轍卜築真成隱者家祗惜芒鞋來較晚  
狂風掃盡石楠花

白舫撐來樹蔭低後期難忘醉花堤行厨儘可咄嗟辦  
蓴菜鱸魚出近溪

尋山莫笑吟髯白落井應嗔醉眼花乞取石泉先解渴  
砂鐺活火煮新茶

十載風塵困頓來回頭不覺笑如雷短衣匹馬同君去  
飽看南山射虎迴

感巢燕哺子

客堂越燕識殘春故壘芹泥補貼新哺子又看成羽翼

賺余幾作喪明人

余去年三月喪子

雨過黍翁錢中丞藕花居留酌得斷句二首

石壘波心八尺臺成林果樹橐駝栽人閒晚熱淘先盡  
著罷圍碁白月來

劇憐造物費工夫設出浮嵐暖翠圖儘買生綃倩誰畫  
白雲中喚大癡無

題自畫枯木竹石

雨溜霜皮半裹苔十圍早具棟梁才石根相倚叢生竹

待取丹山鳳鳥來

宿辨香樓和周青士韻

微酣不敵朔風狂就酌斯樓更洗觴興故蕭然猶在客  
歲行盡矣未還鄉黃蒿岸脚冰粘棹落葉檐牙月透牀  
爲想故園梅百樹可能緣我噤寒香

吟聳寒肩各敝裘懷歸日日倦登樓魚勞濁水悲蘋尾  
烏叫枯林感白頭文字干名真物累江湖泛梗豈身謀  
重過此地期難定阿筆題詩壁上留

金山

突兀凌虛砥柱同焦山對峙勢爭雄諸天樓閣經營外

萬里魚龍指顧中浪噴石稜飛素雪雲昏樹色轉寒風  
每來憑眺興長嘆禹蹟茫茫攬未窮

與邵大憩宮氏園亭

水繞園扉柳拂煙主人方值宦遊年憑誰拜石攜袍笏  
留我聽松斤管弦爲客以來饒樂事過江無日不晴天  
祇憐春去勞牽挽花放將離一黯然

舟之東淘贈吳野人

陋軒詩卷久知名海內風流屬老成能有幾人安草野  
從無一字謁公卿看花獨拄過頭杖試茗新支折脚鐺  
千里論交深自幸孤舟不負渡江行

春盡日與邵大過僧舍茶話和淮陰杜湘草韻

四首

竹岡筍盡復抽芽供給僧窗頓頓茶不道此閒春賸在  
繞闌開徧米囊花

留客山厨爛煮蔬歡然一飽午鐘初詩成自笑非王播  
何必紗籠壁上書

武穆王祠歷變遷頽垣大樹鎖蒼煙至今父老猶懷德

未絕春秋掠社錢

岳武穆曾鎮海陵其祠與僧舍鄰並

兩人握手話林隈歎息陳琳老霸才逃佛也知餘退步  
風塵心事未成灰

余錦泉席上聽眾姬琵琶箏

有酒易傾不夜之圓月有金難鑄不謝之名花秦川公  
子發大笑徧與花月爭豪奢左秦箏右琵琶九枝蠟燭  
光如霞青娥皓齒兩行列袖拂紅牙羞按節初調絙朱  
絲峽口春冰裂再彈捍撥齊車鈴雨淋咽鮫人捧盤撒  
珠淚江妃捐珮鳴環玦瞥驚孤鳳皇飛上梧桐岡啁啾  
百鳥喧頡頏共朝陽劃然一變莫可測湘筠漬血蘭摧  
香逡巡換宮商倏忽移角徵朔風應手捲驚沙白草茫  
茫雁聲死飲恨羈臣擊劍歌裏創戰士聞笳起悽斷故  
園心迸破離人耳收聲一抹五十絃纖纖憐殺春葱指

海東集卷一  
纏頭願將天孫錦化作綵雲團扇裏花殘月落不忍歸  
捲下珠簾隔千里

畫竹石寄壽闕中王山史徵君七十

閒窗落筆倚微醺石丈嶙峋並竹君遠寄老仙供一笑  
未知換得華山雲

題邱翁老梅拄杖

安步雖然可當車此株落手更何如年年陟嶺探梅去  
不道花開却是渠

柯庭汪子令嗣五齡痘殤有善丹青者爲寫指  
日載生圖遺照乘雲車一手指日一手捉笙

一神人御之且預兆弄璋之慶也不揣荒陋  
漫題其幀

汪家神童纔五齡頭玉硤硤眉刷青錦襦雜珮芳蓀聲  
口授指畫心孔靈一朝鸞珠掩光精老龍揮淚翻滄溟  
怒起冰電驅雷霆直排天門扣彤廷誰其主者誰使令  
一百八盤路杳冥瞥然罡風掃穢腥洗滌上界一氣清  
七重行樹葉不零掩映祕殿明窗楹翡翠爲簾琉璃屏  
笙鏞節奏隱可聽綠章封事帝聽熒指揮仙官敕六丁  
神兵千騎馳駟駟擲火萬里金流鈴速檢青籍分渭涇  
不必太陰復鍊形慶雲五色騫鳳翎珠幢金節導雲駟



海粟集卷二  
曦輪閃爍輾不停月月歷徧三十莫葱龍佳氣充門庭  
載生男子應列星犀錢玉果看浴嬰寶誌摩頂祝籤鏗  
長筵湯餅客醉醒羅廿一史陳九經餘書萬軸具作銘  
以俟額誦槐陰廳預歌斯歌君其聆徵祥叶瑞康復寧

海粟集卷第二

海粟集卷第三

仲雍山人顧  
文淵  
雪坡

雪壓竹

次家弟  
緯乾韻

滕六久操權青帝失譴逐譁然弄陰機飛雪壓我竹陵  
暴君子林阻我來往躅積爲巖凝氣蠖節土中伏念之  
空彷徨牆東上晴旭

此君猶吾黨不畏寒徹骨一朝轉陽和干挺脫其碗枝  
葉雖委頓精神終發越泠泠遞虛籟入聽有時歇維梅  
亦堅貞諒哉各區別

雨中就飲張超然無悶堂即事

剗地東風不捲沙，巷深隔絕市中譁。比鄰汲井爭篋酒，小擔沿門半賣花。老博清閒殊適意，貧將儉嗇勉持家。入春頗怪詩爲祟，到處狂題墨似鴉。

雪中渡太湖覽洞庭諸勝四首

廿年心掛洞庭旁，夙願今春始得償。破浪穩開衝雪棹，爭程早立使風檣。湖干小樹能標勝，天末羣峯盡改粧。渾似琉璃成世界，扁舟泛到水中央。八窗洞達豁吟眸，開拓曾懷覽四周。凍勒梅香交二月，雪飛湖面過三洲。黃柑碧酒憑供給，玉柱金庭待紀遊。天許奇觀應晚霽，要盟早見下羣鷗。

距城百里是湖天，一棹來遊興灑然。驟見園林疑洞府，始知烟火有神仙。三層畫閣初迴上，五字詩城不敢專。

山中翁心齋父子俱能詩

試看衆峯當雪後，瑤簑攬攬插欄前。

凍泥融處引詩筇，更擬開船訪舊蹤。范蠡宅荒烟抹柳，毛公壇古雪凌松。遙憐雁逆風頭急，屢看魚翻浪沫重。

物外正須吾輩樂，掛帆歸思一何濃。

時同舟錢孟武仲韋昆玉急欲還里

次韻荅江白沙見贈

碎却琵琶箏悅耳，非古調請撫嶧陽桐。方識指端妙，天風與海濤。冷然發吟嘯，真爲有聲文。移神出孤嶠。

和江白沙題徐文長集原韻

文長閒世才詎肯受羈縛下筆便豪縱其人真磊落是  
時興漢魏公獨心厭薄所以白鹿表一出冠衆作

樂志堂看西府海棠花

春寒料峭收微雨發興尋花覓花主東鄰護花立畫幡  
西舍催花打鼗鼓緣知海棠消息真倒著春衫狂欲舞  
樂志堂前花兩株異種舊傳移蜀府絢爛千枝團錦窠  
歲蕤萬滴黏紅縷天公狡獪弄機杼織得春光密如許  
朝來花盛無匹儔欲攀惱我閒情緒驪山笑靨鬪嬌酣  
越水濃粧爭媚娥花中自昔號神仙只恐當風遂輕舉  
算春已及十之九誰家有此藏春塢楊氏圍屏豈足誇

石家步障何須數吾聞徐侗愛此花結巢花畔飲芳醕  
主人量勝一蕉葉花陰小醉宜拚取夜深無月怕花睡  
請設銅盤燒蠟炬

式燕堂賞牡丹

牡丹花價年來重小葺園亭亦爭種東風著力養花枝  
似錦鮮新換機綜豈知花神擅豪侈疇昔五更先示夢  
攔余直入溫柔鄉隊隊如花色殊衆按節歌翻扇上鸞  
迴身舞落釵頭鳳非烟非霧多變幻覺後猶聞珮環動  
分明夢境自有因約畧花期早猜中時當閨三經穀雨  
春欲闌珊擬相送恰逢錢子招賞花頗喜今朝此身空

堂前羣花如斗大淋漓巧竊胭脂弄一枝枝有葉扶持  
富貴居然自天縱翻階芍藥作嬪嬙麗架薔薇合隨從  
花多釀成香世界勾引游蜂晝喧哄此花賞後難爲眼  
那有芳菲堪伯仲明須重看怕爛漫千杯拚竭蒲萄甕  
狂題儘余雜嘲戲好事憑渠各吟諷城西詩髯欲接踵  
邵青門齋花亦繁盛筆底駸駸闖唐宋余于此花乏好詩力去陳言  
心枉用

題汪慎爲遺墨

寂寞林泉動嘆嗟不圖室邇竟人遐廿年春雨娑羅院  
一夢揚州芍藥花

昔遇翁于破山禪舍極言揚州芍藥之盛

白髮醉鄉空食邑青

山畫幅自名家曾期百歲猶如昨豈我斯言竟繆邪  
八十順世

平生

平生筆硯愛精良不分翻爲不了忙摹帖題詩兼畫竹  
耗磨鬚髮早成霜

畫雨竹贈汪鷗亭中舍

磊砢曾中一吐奇渭川千挺發新枝毫端水墨飛春雨  
恐有蛟龍起硯池

錢倬雲索畫筠石

小筆經營意有餘雲根透漏竹蕭疎請君燈下懸齋壁

欲作秋聲助讀書

茂林書屋圖汪柯庭司城屬畫

昔從汪子棲雒州有堂五架殊爽塏藏書羅列三萬軸  
諸子百家靡不解讀罷移情罨畫溪山亭樹樹銷烟靄  
老榦欹檐蝕蘚斑卑枝拂檻纏蘿帶峻嶒峯勢插天際  
氣色晴陰不時改仰面貪看石狀奇回頭錯應禽聲快  
草暗花明闢靈境岡迴水轉無驚湃由來造物無盡藏  
偏能發泄丹青外撩人詩思若泉湧掀倒潘江翻陸海  
惟詩與畫合一理子獨心領兼神會慚余二者無一長  
却坐虛名反爲累山中追隨請異日願子濟時圖遠大

在川爲楫雲作霖莫更優游守林籟尚希官舍懸此圖  
公暇題詩發光怪

丁丑新正次蔣星來韻五首

賀歲枰筵總率真團圓差喜畧遮貧金花勝出誰家手  
藍尾杯傳末座人挑菜半黏正月雪踏燈又起六街塵  
小堂也合爲元夕預製紅蕖一碗新

立春甲子不曾晴雨雪相仍氣候更喜遇老鄰投杖拜  
苦煩近局潔觴迎紅椒香烈屠蘇酒白韭芽新骨董羹  
挨到鰲山點燈後醉歸鏡鼓揭天聲

髮根不待九陽晞體相宜披古衲衣書列牙籤指几案

爐焚石葉掩窗扉三千界內諸緣妄五十年前萬事非  
只有釣竿辜負汝甚難擇地築苔磯  
巧鵲由來笑拙鳩量才揣分自宜休逢場酒恰開缸面  
到處錢須掛杖頭世法不諳多齟齬王門那許獨遨遊  
舊交只有梅花好半在山亭半水樓  
攝生嬾去學玄門軀幹精強眼未昏爛煮菜根參至味  
薄裝綿絮識奇溫犁耕遇雪蝗無種瓦卜占年稻有孫  
愧把常談和佳什賴君繩削更評論

尚湖泛舟

湖水春來闊扁舟一葉輕山當橋外走花向榜前迎漸

覺風頭活還欣浪勢平恍如天上坐銷得竹枝聲

跋定武蘭亭帖三絕有小序

明宣德間兩淮運使何士英獲于揚州石塔寺井  
中未得之前有白氣纏於上此搨經五季之亂或  
時出没人閒其後高宗南渡輦致行在所失于倉  
惶之際耳事見蘭亭始末云

靖康禍亂南遷流落蘭亭五百年誰料理踪井泥下  
遭時能使氣干天

片石曾經幾劫塵披尋點畫尚精神天流帶右雖刳損  
餘字堪爲近世珍

出人頭地放翁評落筆無多措語精傳出義之舊風采  
漢庭冠劍鉅公卿

貧厨

燕笋朝來壓擔鮮還添白草紫芹鞭貧厨一飯能兼味  
脫串剛銷賣畫錢

種花

老來權作種花翁瘦土原能發舊叢一葉一枝俱有意  
始知烟雨是元功

臨池四絕

一翫庖羲畫再尋倉頡書紛紛蟲鳥蹟竹簡耗無餘

篆隸追秦漢碑殘法殆亡茫乎李丞相邈矣蔡中郎  
歷代遺書蹟師多筆有神鍾王是龍象誰不拜前塵  
執筆無它法徵心在不偏廟堂曾用諫千古柳誠懸

寄題松陵黃省三勝友齋

有菊得勝地允宜稱勝友所以駱丞語黃生不去口齋  
名索余書愧非擘窠手簷前聞蔣菊種類標某某花爲  
隱逸花尤重晚節守豈其性傲霜根荻亦堅久西風催  
持螯葛巾漉吾酒應招近局輩開樽作重九

次韻苦雨

一雨連昏晝何時泥濘乾雲痕縈古堞木杪走驚湍不

海東集卷二  
爨防憂餒無衣恐中寒筆耕垂老計戚戚笑多端

江陵潛移居次錢湘靈先生韻

卜宅林溪似灑西朋交落落省招攜汗青竹簡傳諸子  
月黑菱花感令妻

君元配李夫人伉儷甚篤

老驥志雖千里在沙鷗盟要

一心齊年來世態澆漓甚人面難看雜笑啼

舟抵苜蓿城應張望齋元侯之招二首

細柳風高鼓角催九峯三泖晚烟開不期蓴菜鱸魚美  
恰值元侯見名來

海晏河清保甸畿涼秋幕府肅旌旗三千珠履饒英俊  
羅致何當及布衣

拜瞻 御書世英堂額

啓封藩服荅嘉猷帶礪綿延十世侯 宸翰高懸幸瞻  
仰龍光五色日華浮

古梅

最愛欄邊數樹梅橫枝偃蹇裹莓苔有花便結和羹實  
不特軍中止渴來

榕

綠潑榕陰遍七閩移根幸托古甕盆迢迢驛路三千里  
帶雨和烟入戟門

張望齋元侯出示所藏宋元人名蹟



敢謂平生博識精法書名畫漫論評他時寶繪堂成後  
撰記應標草野名

履硯齋喜晤張曉廬次錢蔚宗韻

雪泥鴻爪年年跡客館今冬復遇翁塵外蕭閒安晚節

毫端飄逸具仙風椽林夢穩茅菴下墨竹神怡石刻中

何日扁舟重相訪論文一借佛燈紅

曉廬華亭人流寓魏塘吳仲圭梅花菴椽林墨竹皆

吳之遺跡也

戒醉

近拋麴蘖擱甌樽過飲能令知識昏怕學劉伶便開戒  
花時禁足出柴門

春日伊目招游拂水舟泊第三橋酒半得一絕

烟雲變滅露巖端散下飛泉弄薄寒幸謝筇枝登絕頂  
酒闌贏得捲簾看

采蓮曲

朝采蓮荷花鮮暮采蓮荷葉圓朝來暮返花葉閒悔登  
金槳木蘭船將葉比衣花比貌青羅著故紅顏老槳動  
驚開比目魚船行衝散雙棲鳥誰唱采蓮歌添儂怨思  
多朱葩煒燿在耀日紫莖婀娜空凌波欲采碧蓮心勞  
儂苦苦尋無端傷素藕纏得絲盈手不如抱取荷花歸  
新月如睂上灣口

初六夜對月

戊辰七月

近市炊烟澹林梢掛一鈎幾年多在客今夕暫登樓對影還興歎呼杯且拍浮蟾蜍莫西墜釋我醒時愁

歲將闌矣城市無一閒人破山樵獨營一室面

山向曝凌南樓諸子挈伴過從居然碩人之寬焉無所事事遂分拈各體聊以銷暇是日余方病酒不能踐約爲補是詩

玄冥氣機忽移換臘月不寒今過半枯林已斷勁箭風一冬無雪映書案天公愛我飾我貧甕有撥醅爐有炭曩時飢凍屢切骨至今迴思動嗟惋誰誇東鄰米實廩

孰羨西舍錢朽貫我只左聽右出耳此生委運徒勞算破山樵者真我友爾汝定交同里閭道我素性若符合修竹有筠松挺榦數日不見互相憶竊恐琴樽常閒斷昨者見招緣酒困日晏起來方櫛盥從添詩逋兼畫債已失前期背流汗爲將剡藤裁尺幅儘掃琅玕供把玩倘堪遮壁和我詩何啻報之錦繡段

二月朔集北山報慈菴分得木字

長林颼颼響深谷海風驅雲散霖霖氣機寒暖迭遷變二月春光猶未足穎師能琴嬾出山獨護蒼松住茅屋斷無俗客來扣門白日丁丁隹啄木詰朝折簡招吾黨

始識穎師真面目薪煨土鈿瀹苦茗坐久殘梅花尚馥  
但非圖畫莫可狀合借潑墨成長幅欲填紙空能無詩  
一時才力俱神速眼前觸景道不盡謾搜天根括地軸  
我時心喜猶見獵不免信手爲貂續人閒斯會未易得  
浪走虛名何足錄請看羣山早放晴開懷莫負杯中潑

西湖

我思西湖歷十年竊豔汪子標新篇

桐溪汪六州有西湖絕句一冊

清風白

月最良夜往往東望心悠然今年仲秋藉吾友  
遊覽邀同船峭帆十幅纜四日置身已在西湖邊西湖  
周廻三十里水匯七十有二泉峯巒三面插雲出一面

城市叢人烟六橋景物兩移換夾岸桃柳今芊綿頓還  
西子舊面目抹濃粧淡殊妖妍每經山樓飽領畧亦款  
竹戶長留連捫碑幾處歎往跡尋詩盡日懷先賢日斜  
遊興正未已更撥短棹乘晴天羣鷗拍翅飛不去裏湖  
香盡擎枯蓮蓴絲柔滑壓擔過鱸魚撥刺隨罾牽可無  
樽酒就猛酌倒囊不乏青銅錢請看湖心亭外月片影  
皎潔輪半圓早聞僧寺打浴鼓遙見遊騎搖歸鞭林梢  
暝色到篷底水面涼氣侵霜顛此廻把觥樂欲死但缺  
蘇小琵琶弦

林和靖墓

次俞犀月韻

水繞孤山不肯流高賢遺蛻在斯邱總無鶴語應先到  
若遇梅開便小留風掠湖心殘暑退樹分亭畔暝雲收  
當年儻改巢由節何重蒼苔此一杯

范希文贈詩有巢由不願仕堯舜豈遺人之句

### 岳王墳

行到棲鴉日未殘豐碑宰樹動秋寒一杯不朽孤臣骨  
千載長摧壯士肝南渡偏安歸歷數北庭和議憤衣冠  
參差終古金牌事并爲于公發永歎

### 飛來峯

靈峯果然奇巨細分縷脉流傳自西竺飛來有僧識荒  
謬寧與較吾徒一無感想由茫昧初鎚鑿出神力不然

狀玲瓏奚獨殊衆石始疑畫變皴嵌空被砂蝕繼訝籀  
經刻蜿蜒遭雨滴庚庚具橫理歷歷呈幻跡當路虎勢  
蹲凌風鵬翅圻羣羝叱欲起巨魚駭將擲仰窺蔽深樹  
俯瞰驚絕壁攀蘿緣上下共藉折齒屐茁芝儘可采流  
髓應許食徑危側容足小憩洞門闢泓泉閟陰罟

旁有龍泓洞

嘯山月白

### 別西湖

十里西湖興未銷何時再撥木蘭橈雲收衆嶺天空闊  
月出千林影動搖鯨吸酒旣汪客醉雁排箏柱美人調

縱然花柳俱荒落也要題詩遍六橋

秋蟲

應候涼風動陰蟲合氣機草根和露泣檐隙向燈飛引  
類何其衆爲生亦甚微夜深休促織貧女正無衣

將之粵還家料理薪水錢崑莘以余遠行設酒

相餞適錢圓沙先生至洗餞更酌賦此爲別

一棹秋風暫抵鄉把杯應合笑念忙黃花籬畔還宜月  
紅葉城西始著霜不分以家爲逆旅便于侵曉發嚴裝

山川勝覽從吾好跋涉何愁萬里長

圓沙以余家貧勸勿遠行

過寧國紀所見二絕

邨邨烏桕齊收子戶戶棧欄半去皮已過漆林新割候  
又交麥壠耦耕時

瓦窰烟罨巖根樹水碓聲喧雨後灘红柿曝來供市飲  
烏薪燒出禦冬寒

雲門

巨石何年鑿當人凜欲崩嘘雲侵仄徑偃樹絡蒼藤構  
屋緣其側疏泉瀉下層停車已薄暮不暇久攀登

白岳

向來聞白岳蓄萃眼初經風忽傳松籟雲偏護石形危  
梯逼象緯深殿走雷霆我欲尋瑤草將窮萬仞青

漁亭

頗覺巾車穩漁亭一晌過鏡空山骨瘦捲地葉聲多亂  
水妨人涉寒裝乏馬馱紛紛擔荷者憐爾習奔波

雨中過響石灘天已昏黑至黃岡橫船

竹篷遮雨暮生寒浪蹴船頭過急灘望見黃岡穩停泊  
一灣燈火簇檣竿

過東湖薦福寺和汪晉賢韻

湖流混混寺東邊馬跡峯遙氣鬱然放屐雨多頻折齒  
振衣寒峭欲加綿山亭碧蘚龜趺在寺前有亭相傳顏魯公所  
構以覆歐碑者今名魯公  
亭旁有表石字畫剝落  
難辨為陶侃先塋不盡荒涼懷古意

幼公書屋閉林烟

昔為戴又  
倫讀書處

鄱陽湖

鄱湖三百里掛席倚風長天地渾空闊荆吳漸渺茫漂  
沙高浪白雁樹凍雲黃歎息康山廟無人薦一觴

出鄱口遣興二首次汪晉賢韻

凜冽風猶北蒼茫路轉西陰晴原不定氣候豈能齊敗  
葉林藏日崩湍水夾泥鄱湖今歷盡回首暮烟迷  
尚遠黃家渡鄉心入夜增驟驚連陣雨寒擁半衾冰荻  
岸纔棲雁鄰船早掩燈惟詩仗消遣才思亦雲興

滕王閣二首

海東集卷三  
四  
瞰江飛閣勢崔嵬長嘯憑闌亦快哉遠辨衡廬天影盡  
平吞楚粵地圖開風檣傍暮如林立朔雁橫空作字來  
憶得落霞秋水白令人驚絕子安才  
月夜應歸帝子魂鳴鑿佩玉杳難聞蒼茫寒樹波濤迴  
慘澹羣山紫翠分尚有記傳韓吏部豈無詩續杜司勳  
偶經此地輕爲別前路三千入瘴雲

豐城劍歌

我乘長風過豐城忽憶典午蒼龍精當年鬱鬱狴犴守  
紫氣每夜衝天星由來至神物終使識者驚一朝掘地  
發石函輒獲兩口錚然鳴稜稜霜鍔鐵花碧拭以赤土

光芒生牢局寶匣慎開看恐有霹靂推軒楹留雌贈雄  
豈無意不知龍泉太阿難隱名隨時伏現究莫測延津  
會合雲晦冥劍兮劍兮爾仍能變化何當飛來使我佩  
之萬里行山深虎豹遠竄跡林昏怪魅潛逃形用爾適  
其時所賴亦非輕奚爲白日蜿蜒蟠水府蒼鱗泥滑莓  
苔腥

新淦道中喜晴且帆風快甚

抽帆十幅劈晴波舟子歡呼卸雨蓑隱隱豐城寒日出  
叢叢新淦翠峯多人家橘柚依沙路農舍牛羊散草坡  
却笑過江三百里不曾聽唱竹枝歌

行笈中偶攜手鈔歐梅詩卷藉以消遣途由宛  
陵廬陵水陸計程約千有餘里得攬其兩地  
之勝又兼讀其文抑何幸也喜而書此

貧無積書貲暇則役毛穎紛紜百家學大要取綱領閒  
嘗遇善本每鈔壺盈挺自唐及宋詩歐梅最機警乃余  
之嗜好孰以鹽醃並繼欲寫蘇集三者成立鼎只今闕  
其一素抱常耿耿披覽到兩公竊謂已自幸豈料讀其  
文得又履其境宛陵環諸山林樾深以靜寒風逼人衣  
澗道雲晦冥廬陵地雖僻章水帶羣嶺森森樹多綠冬  
候少嚴冷江右與江南千里分何迴不知蔚人文當年

各彪炳嗟余丁茲時遊踪逐蓬梗每探其所學猶渴引  
長綆未即見根源實由力不猛是以出辭氣輒類有物  
鯁從茲急操勵奏刀求肯綮天下之至樂學後發深省  
詩成粲然笑有月照烟艇

十八灘九章章五句

荒荒異縣經萬安毒霧散影分林巒暮愁雨宿朝風餐  
開帆驟過五雲驛蒼茫十八灘聲寒

層山犖嶮寒濤湧石插旋渦各森聳木葉纏風耳根悚  
精靈不泯宋孤臣落日灘頭說惶恐

南來氣候殊不同樟葉穠綠楓葉紅曆日倏忽交深冬



前飛哀雁泊何處令人轉憶江之東  
大溜灘過復小溜凍雲拖雨錯昏晝林風騷殺號猛獸  
推篷四顧慘客懷平生蓄眼何常有  
暮帆齊落喧鳴鏡邨人堵立林塘功利箭在箛弦在弮  
不知何山逐獐兔巨天野火燒黃茅  
危磯攢苔石邪豎樹脚麤沙衝暮雨月逆行雲吞復吐  
虎偃啼過斷人聲叢莽中間伏強弩  
烟中挾舵水倒衝篙工爭力怖殺儂森森石齒排劍鋒  
人言險灘只天柱水底白日蟠蛟龍  
日照潭心若瓊宇嬋娟影動峯頭女山花插髻如能語

幾許天風吹不來片雲縹緲疑輕舉  
森梢樹色分山口石勢揭孽從東走喧呼力盡撐篙手  
過此揚帆放意行江盤峽束休回首

八境臺

層臺百尺當崇墉朝來試登雲掃空時雖仲冬氣尚暖  
萬井楓栝紛青紅羣峯磔卓插天際維南巉絕名崆峒  
早經冰雪積崖窵淡日晃耀光玲瓏東西兩界接閩粵  
關津下上千艘通其北章水合貢水往往鼓浪塵長風  
四周面勢莽空闊此身拔出塵埃中通天有巖不得往  
鬱孤遺趾悲榛叢所餘螺亭吾樓爾欲擬剷去煩神工

海東集卷三  
好攜樽俎共暢飲更選林壑終探窮遙思東坡竄嶺外  
路經此地隨飄蓬八詩彈厯亘千古敢有才力還爭雄  
偶然乘興紀斯作雪泥有爪留孤鴻

將抵南安次汪碧巢韻

挽路多紆曲危洵半倚天前行方未已迴望又茫然赤  
石依山驛黃旗上水船南安底處所樹影入蒼烟

過大庾嶺

兩崖峭拔路中盤天設嚴關亦偉觀土俗乍驚南服異  
天風不比北邊寒下山榕樹迎人綠辟瘴檳榔染口丹  
獨歎曲江開鑿後古碑磨滅不重刊

雨中泊平浦驛懷周青士時值其從都門暫還

梅里次汪晉賢韻

南北飄蓬各一邊薊門庾嶺兩茫然騎驢定躡河冰渡  
檣棹愁聽瘴雨眠遠札昨隨賓雁達離懷今爲主人牽  
晉賢以不  
得晤爲恨計程料是還家候兒女杯拌咏雪天

題張曲江祠

梅銷嶺頭路險巖自公開鑿方坦夷道旁長松手所植  
雲斂雨剝撐虬枝迄今邦人懷舊德不乏俎豆存荒祠  
公於開元當盛際歷躋廊廟兼文詞至尊憐才遇殊寵  
祇惜鸞鳳同鳶鴟薦賢稱職翻被劾請誅巨猾言寧欺

海東集卷三  
一朝漁陽縱突騎逆氣白日昏旌旗蛾眉決絕奸佞死  
宗社幾覆民流離始知賢哲應運起言出響應猶著龜  
煌煌史冊垂蓋壤大名豈特懸朱維我從度嶺訪遺蹟  
欲斫秦莽搜殘碑人言子孫雖散處尚免徭役安鉏犁  
乃知忠信難泯滅雖歷百世令人思

彈子磯

江船放出黃茅峽陡覺蠻荒開眼界羣峯起伏多變狀  
彈子磯名吁可怪茫茫造化竟難詰奚爲鼓此大鑪鞴  
火燒水鍊出絕壁卵色青天鑱欲壞仰看半面疑斧削  
根插洪濤抗驚湃雲嘘乳竇滋草木水穿石竅容鱗介  
凜然寒氣悚毛骨據此奇觀謾稱快千搜萬索題不得  
令我心煩劇爬疥那知宇宙多異境自慙宵次何其隘  
會當覓取馬夏輩裂幅生綃倩揮灑

觀音巖

蒼巖撐雲開一角天破曉扳起百仞餘仰闕殊縹緲  
罅絕泥滓積潤送蘿蔦影落寒江中盡日流不了旁無  
側足地有洞黑而窈參參瓊乳懸雙攫青蓮小佛閣嵌  
其腹結構出意表僧廿寸枯禪視世定亦藐未遑卸孤  
蓬談空舌難掉何年擺塵務忘機愧鷗鳥

涇陽峽

從金虛谷應撥櫛衆灘移青鞞榕陰合黃諳柚實垂成  
樓懸日冷棧路俯江危頗覺愁襟豁詩成一解頤

飛來寺

舊說飛來寺今逢峽水濱香臺寒樹簇蘚磴濕雲斂氣  
色憑龍象虛空護鬼神何緣來聽法藉彼導迷津

清遠縣夜泊

此地停橈穩渾無浪滾沙峽烟籠半塔江樹帶千家鼓  
角寒城斷魚鹽臘市譁夜來看斗柄身已在天涯

三江口候潮

上下千樞集三江待暮潮雨吹邨樹暗水啣岸苔消衣

續來南減顛毛傍瘴凋此行差足喜詩草積盈瓢

畫三駿贈汪交臣大參

經營慘澹出驪黃颯颯林風掃筆床不畫錦幪都屹立  
恐無殊相遇孫陽

閱江樓 肇慶

江樓百尺縱躋攀風捲潮聲吼暮山雄鎮旌麾方偃武  
前朝碑板有平蠻 明汪伯玉撰  
文周公瑕書 淹遲歲盡添鄉思飄蕩天涯

瘦旅顏遠道尚餘千里外憑高空擬賦刀鐮

七星巖

蠻荒地形添犖确七星巖落西南角攀援藤蘿昇半頂

海東集卷三  
骨輕詫得飛仙學猿猱驚叫鷓鴣啼導我盤迴探幽邈  
諸巖奇蹟閱莫窺誰把混沌槌破殼始穿虛洞蘚數級  
忽漏青天雲一握玲瓏石乳鬪融結隨類標名匪雕斲  
璇璣之臺通象緯篆文舊勒多斑駁傍疑瘴霧噓空隙  
下恐蛟龍起雷雹有僧棲此習禪定我獨奚爲溷塵濁  
百年消得幾緗屐浪擲歲月渾不覺會須縱遊擬尚子  
泰華恒衡暨嵩岳倘從窮谷遇異人茯苓應許長鑱斲  
寶月臺  
出郭離喧雜留人寶月臺雲從端峽起樹向瀝湖開果  
覺諸天迴都將萬象該倚闌聞梵唄頓使壯心灰

入新興界

客路逾荒僻蠻邨未識名林青嵐氣染山赤日輪行怪  
蔓籬編篠酸瓢擔賣橙欲標風土紀喧耳厭灘聲

桐山寺

其地即古之新州  
爲盧能采樵處

野火燒松禿蒼巖拱道場撲人花氣烈漱齒石泉香佛  
法當衰替緇流半退藏莫憑檀施力諸刹率荒涼

電白城樓

不倦登樓興能忘在異鄉軍城如斗大島樹過人長天  
末分交趾山根插巨洋吟懷方未已安得酒千觴

熱水山

滾滾通泉眼分流古道旁  
蒸衣猶坐甑濡手訝探湯  
羣燕多忘蟄奇花特鬪香  
時臘盡燕子成羣桃李梅花已爛然  
寧須究茲理陰火地中藏

初食荔支

南荒五月天煩燠千樹纍纍荔支熟  
一雨山家競采之帶葉傾筐市中鬻  
初嘗綠者簇芒刺齒頰流酸老省感  
暨將紅鮮揀數顆津液雖甘無厚肉  
人言此皆凡種耳品類元來各標目  
就中最美號進奉因天寶所貢名之  
紫羅囊薄軟裹玉寒漿如蜜中邊甜  
日啖百千寧厭足其次黑葉能抗衡  
綠膚微皺紅生栗肉圓核小味亦佳  
飮餽雕梓

侑芳醪塘北火山未暇嘗此下瑣瑣  
何煩錄回思東吳出楊梅所重銅坑及  
光福有紅有白紫最佳及時摘賣無經  
宿若將風味兩相較權把輸贏作和局  
天涯一飽揮此篇太劇傷廉笑捫腹

雨後遊五仙觀

雨過炎方爽似秋晚來殊快洞天遊  
未諳遺穗何莖是但怪騎羊有石留  
透井日光行赤道浮林海氣上丹樓  
緣知陵谷多遷變此地人稱晉渡頭

海幢寺

金榜山門氣勢雄珠江白日舞魚龍  
藏經空覓三層閣

郡人以藏經閣不利  
文學因毀為平屋

聽法纔撞數杵鐘風拔潮聲奔海急瘴開

榕樹覆廊濃登臨忽動鄉閭念天末重遮千萬峯

昔年錢黍翁中

丞招龔合肥曹樵

李諸公雅集於此

海粟集卷第三

海粟集卷第四

仲雍山人顧

文淵

雪坡

高涼雜詩

并引

高涼為古南巴地山海錯盤嶺徭雜處丁卯夏桐  
鄉汪子晉賢孟兄曉菴判是郡攝太守印其年秋  
感瘴癘而歿十月訃至晉賢乃挈其孤姪遠昭邀  
余同行舟車跋涉經六千餘王歲逼除抵官解經  
理喪事明年春末遠昭扶觀先還天涯作別不禁  
涕淚之潸然也自後客居荒寂無以消遣遂按圖  
經與晉賢揆覽山水問風俗審氣候逮草木鳥獸

海東集卷四  
往古迄今之事蹟可備采者輒用片紙錄之得絕  
句四十餘首號高涼雜興

山郡荒荒瘴氣開喧闐簫鼓鬧衙來惱人桃李爭先發  
早挽東風漾酒杯除夕元旦各官署都  
有鼓吹謂之鬧衙門

月照牙前白似霜元宵鼓笛擁圓場花燈亂眼蠻兒舞  
箇箇新腔換弋陽燈用五綵紙飾以花草兼有百花燈以雜碎紙紅白相  
間砌成元夜蠻兒扮演雜劇或乘紙馬燈遶場旋舞或

造紙船載蠻兒以行其曲調閒  
有唱弋陽腔者名外江曲子

柳條葉葉鬪眉長新搭鞦韆出蠓牆忽地笑聲風趕起  
小娃學得北人粧營兵住處半設鞦  
韆染北人之習也

味到南京厭海腥蠓粘蠶負各殊形朶頤那得江瑤柱

索莫花陰酒半餅

幾家竹屋遶籬笆跣足青屨事績麻同伴釀錢邀瞽嫗

豆花棚下聽琵琶

居民悉編竹為廬間有蓋瓦者婦女多  
椎跣以績麻為業 扁豆花四季不絕

對對紅旗鼓笛遙緣知吉日定婚朝藤梓掛綵擡庚帖

椰子檳榔壓擔挑

俗以椰子檳榔為  
聘自過梅嶺皆然

蠻俗家家使古錢歷朝年號字形全五銖半兩土花蝕

輪郭分明只貨泉

高雷廉各郡至交趾恒川漢唐宋錢  
五銖半兩貨泉三種俗謂之番錢

萬里車書處處同此邦還未暢王風但餘武備無文事

寂寞荒林掩學宮

細雨春場草遍青天涯懷舊涕先零兩朝前後皇華使



不及賡詩射圃亭

明季吾鄉魏仲雪奉使衡文有觀德堂記射圃亭詩載郡志 本朝順治間先師錢登翁亦任是職廣東各郡

邑俱屬考試惟茲郡值偽安西之亂按臨三日幾罹難故詩文缺焉

城陰重浚墨池泉筆架峯虛插瘴煙碑版不逢唐楷法

化州訛載柳公權

墨池舊為城所歷教授某重浚筆架山在城南適對學宮影落池內形家云筆山向外故文士少 化州唐改

辯州志列唐柳公權于名宦而通志作柳公瓘致本傳公權未嘗刺辯州豈權瓘相似而訛歟

徹曉蠻風掃瘴烟上官灣水碧于天木棉花老春分後

怕走山南聽杜鵑

上官灣在城東北崖石高峻淵深莫測 木棉一名斑枝花

觀山寺裏日盤桓異卉紛紛總眼寒惟愛佛桑花豔發

膽甌剛折數枝看

觀山一名昇真山晉永嘉潘茂名于此昇舉後築觀其上故名寺因廢址而建遂名觀山寺

老僧新焙玉泉茶水沸砂鐺炮嫩牙試飲連甌潤枯吻

清吟不厭對蕉花

玉泉菴中有玉井相傳潘仙所遺泉已湮塞上多種茶

傍竹官齋葺再新蠹灰泥壁窮遮塵夜窗祇苦書難檢

鼠上燈檠不避人

鼠狀可畏白晝行八案驅之不去夜尤甚

雨餘青草瘴雲蒸連夜蛙聲苦沸騰吾欲灑灰焚牡鞠

黑甜一枕實難憑

蛙名癩蛤蚧黑脊狀甚瘳惡雨後噪呼竟夕

清明日暖百花翻荷傘邨娃祭掃歸憶殺江南此時節

白楊風捲紙錢飛

婦女出遊悉張傘遮面以避路人

峒猺隔宿乏春糧日恃粘竿弩箭強搜取珍禽與文獸

趁墟料揀小檳榔

檳榔小者為貴名棗兒檳榔

一片貞珉勒諭鹽粵商射利竟無厭可憐竈戶添丁口

熬鹵成堆食未沾

郡城東五里山之南鹽估悉居其地謂之鹽埠有諭鹽碑為明天啟間嶺南參議晉江蘇字庶撰文畧而錄之

曰高郡鹽餉僅四百零量地大小視戶孰多派入丁口餉奚用尚上無虧國下惠蒼黎每丁分釐足支一年肩而易粟俯仰攸資誰其主此饅道司之盡革商引任彼譟呼堅弗為動絕去私書力請兩臺補餉報俞貧鬻靡禁鹽利四通昔時食貴餉且六文今茲食賤一文易餉公老懼舞闔郡同春

蒼黎窘促苦官逋學索累累塞路兩賠墊無錢受鞭撻

連年空望兩收租

各州縣每歲兩收稻米米恒價二錢五分一石餘若歲歉價至四五錢民便飢死至鬻子女以完糧比比皆是

殊慘人也

種穀栽麻莫補勞千邨編戶罄脂膏豐凶何藉毛仙卜

願得麩鳴活爾曹

東晉有毛方者得服氣法凡水旱將至預以告人無不驗後隱去茂名縣有寶山秀麗如珠圖經云山有麩

鳴則赦書至

土風疫癘信巫師總入膏肓不用醫一著最憐燒艾苦

古明堂穴竟誰知

俗信鬼過疾惟宰牲祀鬼不用醫藥病人幸痊其家插柳枝于門首親鄰無敢入戶三日無效輒以艾炷灼病

者甚至焦爛而斃

東坑瀑布灑林長中有危厓抱石堂賴得龐夫人廟在

不愁無雨灌田秧

東坑舊名龐瀑上有龐夫人廟歲早禱雨輒應

墟上朝來貨物饒牛車輾轉過南橋租田新麥家機葛

換穀聊資種稻苗

墟名不一近郭惟沙坡曹江低沙石鼓四墟貿易為多石鼓次之每月挨期輪轉成市

擔頭賣菜日攔街白苧王瓜雜紫加苦憶故園鮮筍美

每餐惆悵滯天涯

二月盡苧菜瓜茄之屬紛紛滿街竹筍味苦不中食

山邨候熱汗霑裳路隔思乾井水香權借荔枝陰下坐

不憑高處不風涼

城東有思乾井或曰潘仙煉丹所遺水特甘美

窳堵撐雲歇寶光曾遭雷火裂西旁至今絕頂無人到

百尺蚌蛇白日藏

城西岸寶光塔相傳有道士登其頂祈雨雷震死于是西面俱裂近有巨蚌出没人不敢上

榕根屈曲作週垣土偶荒祠半掩門已斷人來擲杯琰

定過邨社賽雞豚

去觀山一里雷廟後榕樹大十圍綠陰四覆巨畝許其根環繞如牆垣

無端脩楔過芳辰欲憩山亭雨阻人此集杯棹須盡日

離支花已十分春

同客西泠汪次燾莫且言攜酌會心亭時荔支花大開

擗殘柑子飲椰漿葛粉流匙最晚嘗自笑老饕圖口腹

還思新麵溲枕榔

柑子色純紅皮薄土產中之尤者葛粉漬葛根為之能解酒毒椰漿性最寒味如淡白酒枕榔麵其樹皮中有

屑白而細可作餅餌

清晨行過鑑江亭草際風迴遠馨憐殺白鷗拖彗尾

遮身不穩竹梢青

鑑江亭在觀山之側江水紆曲流入大洋白鷗形似山雞白質黑章尾長三四尺距嘴純丹亦有青黑者

漁家每候雨開晴竹筏聯翩逆水撐隨路便遮三面網

不容一尾脫身行

江水隨灘勢瀉下大雨後漁人爭截長網下流所獲甚多

高將軍葬泰陵旁第宅遺基草遍荒目斷紅塵飛一騎

玉環遺得荔支香

唐高力士宅在茂名縣荔支天寶間所貢其名甚繁

籬落薔薇亂放英田家打麥削場平茜蓑竹傘歸寧女

新墾騎牛護轎行

鄉民稍豐足者出入乘烏捷

幾聲都護孔家禽翠尾潛消一半金困汝朱籠殊可惜

花殘豆蔻損春心

孔雀出羅州山中雌者尾短無金雄者有之春生夏彫與花萼同盛衰自喜其尾而甚妒其鳴若曰都護都護

春深茉莉簇花稠東舍西鄰結作球若並素馨應奪色

論香還替木樨愁 素馨未春先開木樨四季不絕土人以花結作圓球中實佛桑一朵賣于街市

樓額觀風亦等閒倚空層檻可躋攀題詩易得神仙和

應是蓬萊指顧閒 化州城上有觀風樓宋天曆間僉憲呂沈初有詩落成後一日樓版上書李仙和詩讀方畢字蹟隨沒

海國當年物產殊文鮎生玉鬣含冰更奇駢馬衝波出

也似犀牛角一株 事俱出南越志

銅柱西南瘴氣深奇峯錯列樹陰森象犀翡翠年年有

那比瓊山產水沈 水沈瓊山所產欲取者先斷其積年老根經歲皮幹朽爛而木心與枝節不壞者即香也堅黑沈水者為沈香

細枝堅實不爛者為青桂半浮半沈者為雞骨形如馬蹄者為馬蹄粗者為棧香香雖五種其木同一本也

轅門鼓吹柳風清錯立旌麾列五營只有狼獾須駕馭

炎荒種落異編氓 狼獾獯三種俱槃瓠之苗裔賦性頑獷難繩以法自前代始調募為兵至今猶分為狼兵獯兵獯兵云

地分層齒存烽堠山扼咽喉設砲臺莫怪綠林還嘯聚

小函關又長蒿萊 去城一里許有小函谷關通信宜羅定諸州縣為東道扼要之衝前明承平日久鞠為茂草崇禎間參政晉江

王際遠率郡縣營成今復傾圮

新買黃猿產峽山生成慧黠菓能攀迴船帶爾端州過

試看留僧碧玉環 玉環唐孫恪事見唐人小說

吹斷譙樓畫角聲鯨波日氣射山城龍山松柏雲遮徧

何處題詩覓老兵 宋紹興間有吹角老兵日題詩于信宜譙樓云畫角吹來歲月深譙樓無古亦無今不如歸我龍山去松柏

青青何處尋世傳以為仙龍山在縣東二十里山勢險峻有風雨二窖其深莫測有龍伏其中故名

樹綠潮黃龍毋灣天教靈物產人寰偶徵事蹟懷鄉國

龍廟荒涼在頂山 信宜水西有婦往汲一男子自河中出與之合後聞饋魚以食其姑已而婦有娠詰之以前事對後產二子俱

逃入水婦卒葬之日風雨大作河水氾溢將婦柩摧去易大石棺葬于東灣因名龍母灣吾鄉白龍亦人產也事差相類至今龍廟中禱雨輒應

天涯吟苦鬢先華采藥山邨得幾家益智杖頭初結子

合歡葉底半合葩益智合歡皆土產也

歸途日記

軍城鼓打一更强早聽梢工動櫓牀斗覺天涯歸思好

江心珠母鬪蟾光夜發珠江

佛山烟樹蔽朝暎商泊連樯集市門劇喜推篷瘴銷盡

荻根蓼節露潮痕次佛山

木棉灘口雨蒼茫樹樹經冬葉半黃腸斷鷓鴣啼切候

春風花老客高涼經木棉塘

浩浩灘聲抑復揚船窗風捲杜蘅香酒醒燭跋聽殘雨

賸讀離騷一轉腸牛尾灘

珍重端州研出羣寒泉浴墨潤生文吳郎許贈長相憶

踏裂層空割紫雲抵高臺憶下巖研寄吳子遠

被岸黃茆挽路通山根古縣瘴烟籠水程不計郵籤報

入峽還須半席風過清遠縣

舉頭偏仄峽中天上水朝朝百丈深喜看山增眼力

拖樓風逆爨無煙出峽

名山占斷羨僧家木壽泉香再試茶自古英雄尋退步

他年老願著袈裟重過飛來寺

十月芙蓉尚斬新數株花發峽江春粵宮廢久無脂粉

空谷何緣出美人峽岸多木芙蓉花紅白相映殊可人意

陡壁懸藤緝飲孫盤空棧路入雲高尋常經過心還怯

况值天風鼓暮濤入大廟峽

候兵水次立旗杠樹閣叢祠響石淙日暮捫碑尋故實

依稀衛颯過滇江泊大廟峽上有曹妃廟其旁卧碑為尚平南脩三峽石橋記中有漢衛颯過滇江事

峽人生業半烟波打槳江心設網多納却魚租儘衣食

渠知天地有干戈過滇江其地多漁戶時聞西邊之警

葦葉茆花夾岸稠蠻童峽口牧羣牛戴嵩畫本天然在

只恨徐生不共遊江邊多散牧孳牯十百成羣水草映帶恍然吾鄉小景因憶徐允平畫

長嘯千崖景狀殊半空蒼翠撲肌膚眼中自有英州峽

奇石方知天下無英德峽石勢變狀百出誠天南奇觀

更闌蠟炬未全銷心在還鄉入夢遙惱殺竹篷連陣雨

一聲聲似北窗蕉門頭灘夜泊聞雨

撐空磚塔出江濱小邑人家樹裏分讓與米顛搜怪石

兩番孤負峽峯雲次英德縣因風雨未得詣市購石

峽雨啼猿藏閣樹江晴羣鷺浴盤澗憑空突出嶙峋石

恨不停橈濯足歌江心壘石玲瓏嵌空水由隙竅中出入

幢幢巖罅颯燈光中有枯禪挂鉢囊定假音聲求解脫

江濤日夜撼繩牀泊觀音巖

江心截過櫓雙搖指顧蘆花挽路遙水到五溇城更急  
齊牽竹纜上山椒

次清溪驛時連雨水勢溜甚退而復上者再始經五溇城

覆岸綠榕爲社樹依山瓦屋是蠻邨陸行直接韶州路  
虎豹林深斷客魂

經大阮口並江古榕三株有妖憑之行旅刑牲以祭

曲江不斷衆山青哀壑松濤慘客聽名狀萬端無可問  
昌黎曾此借圖經

曲江

石出江痕二尺餘水清直可數遊魚丹崖對面平如削  
未暇留題作草書

白土塘

林腰黃日下層崖十里韶江漾暮霞喜得晴開冬甲子  
乘車穩看嶺梅花

魚梁翡翠成雙立蓼岸蜻蜓相戴飛天氣溫暾江路穩

鄰船小婦綻寒衣

連日陰雨喜甲子始晴

關吏何從權稅錢客裝連束只殘編濂渠開篋探奇貨

更有英州石兩拳

過韶關行裝惟圖書紙筆例無死語二

百丈斜牽逆水來灘聲直瀉兩崖開山頭樵擔收煤炭  
灣口田家積稻堆

灣頭

壁掛水簾痕尚濕松穿瀑布響猶聞推篷動我匡廬思  
回首冷然嘯白雲

歷灣頭層崖峻削飛流界道不減匡山

松籟遙傳上界寒半空虎榜出雲端散人若許標名字  
我欲凌風跨素鸞

虎榜山丹壁千仞橫巨霄漢

雲護霜天曉色新薄裝衣絮稱歸人丹楓乍見新江口

錯認桃花應小春

達新江始見楓葉

石出沙崩浪沫乾挽船十里上天難何當倒捲新江水

直抵南雄穩過灘

都安塘

擔負紛紛莫息肩山程最苦跼為天一亭兩度鄉人憩

豈特炎荒父老傳

離南雄三十里道側一亭吾鄉蔣芋田少參念民役勞瘁炎蒸不輟搆以備其休息者扁曰憩亭

抖擻征衣脫瘴嵐吟髭自怪白鬢鬢雄關始信梅銷嶺

雁字橫來怕向南

嶺頭一碑刻雁回人遠四大字筆勢雄傑東魯七齡童子某手書

莓苔石滑疑無路楓栝林深不見天貪却上層仙館好

裹茶虛負兩泓泉

北塢中僧菴數椽石泉二眼清冽可愛上有真武殿

荒荒林落過新城鴨隊依灘小艇橫却羨田家勤種植

犁頭剷蘚又深耕

次新城

一陣鷓鴣臭觸人漁家竹筏鬧蘆汀莫輕翻動蛟龍窟

不是凡魚有逆鱗

土人多乘竹筏放鷓鴣相法

邨家日暮輟扶犁新築牛宮夾竹籬靠壁入餅藏綠蟻

填溝沃土掘蹲鴟

歐塘

畫角聲中月滿天喜無軍埃起烽烟舉杯亦覺添豪興

旗幟揚風四十船

次儲潭廟鄰船為平湖羅協鎮高雷總鎮家口是年夏楚中兵變未幾討平

霧樹中分鏡吹聲舳艫相接下灘行何當剷盡森森石

萬古江流似掌平

發儲潭



兩日風湍胆亦寒迴看亂石勢噴坑從今識得西江趣

古木荒城抵萬安次萬安縣

罨樹窰煙接水涯餅罌就買貯茅柴還思聽擊秦人缶

倚醉悲歌蕩老懷窰頭

日出人譁蜀口州吳檣粵柁未開頭黃柑各就園丁買

綠醞還嘗野店筍蜀口

鳳皇邨舍廿年初黃菊東籬饌薦魚遠客每餐懷老學

夜窗燒燭講詩書次泰和縣就船買巨鱗作羹憶癸卯十月錢圓沙先生邀至鳳皇邨採魚設饌勉勵苦學閱二十餘冬每飯不

能忘也

山山楓樹未彫零一葉舟疑入畫屏手閱歐詩問前路

水夫剛道至廬陵江平無風諸山楓葉紅黃如錦適閱歐詩未竟已達廬陵

木奴戶戶種千頭日暮丁男罷擔收賣趁商船賤如土

何當太史等封侯夜泊河埠其地產橘

前朝屈指數羣雄屢出需臣策首功談到宸濠就擒事

豫章白日撼江風樟樹鎮為王陽明誓師處

一株頑鐵積蛟涎佩劍來看我亦仙空憶龍沙遺識在

樵陽八百會何年鐵樹宮

面江佛閣倚雲高擬聽鈞天整客袍彷彿蛟螭呈筍簾

空中節奏混風濤鈞天閣

一杯分手在天涯歲晚歸心各繫家我別汪倫倫別我

碧潭楓映似桃花

次徐汭汪碧巢先就饒州陸行余與莫且言舟進趙家漚

兩龍當日戰鄱陽廟廢功臣草樹荒尚有英靈作風雨

恰如萬矢射蓬檣

次鄱湖口與莫且言談明太祖與陳友諒決戰事是夜風雨暴至

日夜江風鼓大鑪津頭木葉半摧枯披衣且向篷窗坐

敵得嚴寒有市酤

阻風龍津

城頭薜荔散寒烟檣綽齊停運米船侵早賓神喧鼓笛

一叢人遶戲場圓

安仁縣

傑閣當山下設門石坡松浪吼黃昏不因拋纜鷹潭口

裏面誰知裏一邨

鷹潭

酒旗斜插屋山頭怪樹藤纏帶瘦瘠林末人停竹筍子

渡船橫處市初收

晚次弋陽界樣船小娘灘

天西日未下蒼厓十幅帆風快客懷烏柏樹邊停水碓

黃沙溝畔泊松簿

過黃沙溝

沙步連檣識要衝人烟萬井逼深冬重重紫翠過江去

蜿蜒山形詫九龍

鈞山縣對岸九峯峯勢起伏若龍土人名為九龍過江

鐵索浮梁接廢城往年兵燹困民生無端聽著琵琶語

猶帶邊關悽楚聲

泊廣信城聞鄰舟琵琶

荒邨一飯復山行沙路蜿蜿到邑城偶憩水樓緣解渴

松風遞出煮茶聲

早飯張坂至玉山縣就茶坊候船

市井塵喧集米鹽山城樹暖北風恬殘冬淺瀨稀舟楫

顧直青錢一倍添進常山城買下瀨船

歸程千里儘銷愁滿意風帆下瀨舟橋圃柏林忙應接

日斜城郭到衢州發常山便風張帆順流而下達衢州

天陰青燐滿沙場獨立西風弔國場百戰功高餘白骨

令人談舌冷侯王夜泊三衢所見荒原廢壘猶然慘目感而弔之

擁著寒衾睡始酣起來篷背濕浮嵐抽帆早過雞鳴塔

撥櫓還經樟樹潭五更客船明抵樟樹潭

豁訝石洞浪搜空椎鑿成樓出巧二不得憑欄一迴坐

白鷗嗔殺滿帆風龍游水次過艾公祠

萬家城郭俯蘭谿落木含風日未西聚泊檣竿爭趁市

半沽臘酒買豚蹄晚次蘭谿

桐江千尺足風濤物色羊裘使者勞不將不侯誰得似

釣臺直逼客星高嚴子陵釣臺

月挂蒼厓夜氣濛水生鱗甲漾微風也將詩意徵前事

瀟灑桐廬憶范公月夜達桐廬因記范文正瀟灑桐廬郡之作

畫須造物為師法試看林巒薄霧開欲覓笥箕泉畔客

一聲簫杖大癡來過富春林巒秀發恍入其久畫中笥箕泉在西湖子久寓地也

滿天雪意抵江關斗酒分歧動別顏偶訂西湖探梅約

意先飛鶴到孤山次錢塘與莫且言話別因訂來春探梅湖上

王正子曰歸途日紀雪坡從嶺南歸江左途中所

海粟集卷四  
作也憶丁巳年余自燕赴粵登高涉深耳目所及  
曾有詩若干首惜乎卷帙散失百無一存今讀其  
詩筆酣墨飽觸物成章又不禁動我今昔之感矣  
雖然人有敏鈍詩有工拙余鈍而拙者也雪坡之  
詩一出將與康樂遊山少陵入蜀並垂不朽余詩  
幸散失無存藉以藏拙若卷帙具在出以較短長  
寧能免形穢之誚邪

海粟集卷第四

海粟集卷第五

仲雍山人顧

文淵

雪坡

題張穆之畫黃鸝修翎圖

粵東鐵橋叟善畫翎毛漾癖愛黃鸝子落筆得情狀利  
嘴梳翎翎側目有所向身在百鳥中勇決猶猛將安能  
奉至尊一識畋遊壯指揮應雲旗呼縱顧霜仗平蕪起  
秋風搏擊神轉王奚獨立樹枝迴惑老崖嶂徒費良工  
心見之色悽悵

紀水

癸酉  
仲夏

粵自周東遷凌夷至戰國有地界漳衛往往憂墊溺自

聞瓠子歌甚有曠厥職豬洩爲之備廼安不毛宅平陸  
墾爲田耕種賴蓄積每歲邀豐稔貿易成利窟其土高  
以燥騁望有荒陌不比吾吳中每慮靈雨厄此說竟大  
謬雨慣亦綿密陰雲布成陣助暴轟霹靂五月六月交  
晝夜不停息通塗漲行潦洶湧連郡邑譬猶遇狂寇那  
暇堅壘壁紛紛性命憂小家及鉅室柳堤禦外河豈料  
內泛溢風濤撒屋去糜爛粟與麥如逢吳中水令我廢  
寢食欲借君前箸所籌無上策朝愁岳吐雲夜恐月離  
畢除非戮商羊惜哉疎劍術竊幸天聽卑須臾獲昭格  
遂決土囊口掃蕩黯慘色林鳩各呼婦杲杲東出日旬

餘水勢退迅速若驅叱馬牛越溝澮驗水不盈尺邨場  
洗礫礫土垣挂襪襖黍稷苗芄然如人起疴疾至竟因  
何故致彼陰陽逆天道寧改常多恐下情激若曰弭水  
患枝派易分孽還在長民者勵已嚴於律從茲召和氣  
災不限南北

和陶連雨獨飲二首

秋成向誰問田禾早蕩然連朝又風雨亂我方寸閒人  
有不火食名之曰神仙浪求嗟無及徒使損性天此事  
姑置之一壺酌且先再酌入渾淪神理自來還安得中  
山釀昏昏度饑年留我幻軀在其餘更何言

海東集卷五  
圖書娛我老日長腹枵然吞紙以療飢廁身蠹魚間魚  
能化脉望字必三食仙我乏騰化術奈倚穀爲天嗟爾  
一微蟲乃得氣之先氣機無停運暮往朝復還人生貴  
聞道聊盡草木年以外悉委順持尔輒忘言

勉學詩弟子三首

鼓琴有師曠善棋有奕秋未能造其極名豈千載流涼  
風霎爾至叢桂山之幽讀書願精進勉旃躁與浮  
時花多應節草蟲又鳴秋化機無信運淹忽歲月流學  
詩欲趨古且窺韓孟幽鄭聲惡亂雅切勿隨沈浮  
壯學是東作胸藏成吾秋若以盜虛聲便非我同流歷

攬山水勝縱探草木幽于茲有所得富貴真雲浮

移居四首

春初居巷北倏爾兩旬過以意經營治隨時栽植多桑  
榆收晚景塵世閱頽波劇喜暄和早萌芽發古柯  
招呼須折簡張文與殷兄花待移罇賞山宜放屐行能  
無詩索和閒有畫催成每事殷勤錄他年當輟耕  
面南開典籍遑計一瓊寒名抵鴻毛重身求鼎足安饑  
禽呼就掌嘉樹惜圍欄賸有烟波夢青蓑伴釣竿  
修葺茅檐外紛紛類拾遺洗苔移石供種藕作盆池近  
屬多膠漆同人祝耄期眼前無俗物安堵自然宜

海東集卷五  
端午次日海粟軒留諸同人小飲得催字

小集仍端午同人  
不速來門當窮巷  
闢筵傍綠陰開  
菱葉解新糝蒲香  
泛舊醅醉題俱脫  
藁山雨莫相催

新綠

吐葉由纖末枝枝  
綠布勻一邊遮老  
屋四面覆比鄰似  
水應淘暑無風亦  
爽人靜中觀物變  
花落不成塵

劍池

空鑄三千劍藏來  
碧壙深鐵花延石  
罅霜葉照潭心  
虎自當年踞龍曾  
半夜吟俯窺餘伯  
氣毛骨冷森森

千人石

兜率空中見盤陀  
粟裏藏儘容千衆  
坐能攝百燈光花  
塔孤撐月珠林巧  
避霜此時觀世界  
心地自清涼

點頭石

生公呈伎倆頑礦  
聚爲徒說法能如  
是斯人今則無經  
臺雲自湧坐具草  
常敷却怪通消息  
禪林起煨鑪

試劍石

頑然一片石曾說  
試干將利刃開星  
暈銛鋒迸電光人  
皆生錯愕事恐屬  
荒唐劍去遺名在  
徒迴俠客腸

真孃墓

一抔埋粉黛千載  
謝紛華豔骨銷爲  
土香魂托在花名

傳歌舞地影落畫圖家始信風情別無人號狹邪

輓臧喟亭侍御二首

憲府名傳久曾聞筮仕初殫心良有待善策不防疎桃  
李成覺舍桑麻賴漕渠至今稱舊德十倍雨隨車  
大賢生盛際經國展奇才奏績 天顏喜懷恩物論該  
柏臺霜正肅薇省月空來誰料辭丹陛青鷁挽不廻

八駿圖爲柯庭汪子畫

國朝畫馬能者誰羅浮張穆字穆之丹砂久餌作仙去  
粉本流落天之涯余從得此輒技癢每發畫與殊淋漓  
剡谿造紙供不竭握筆犀利真如錐嘗聞周王御八駿

西狩萬里窮瑤池天生造父識龍種不然羈鞅無人施  
憑空摸索出其狀要取骨相多權奇麟鬐鳳膺與虎脊  
雙瞳紫電光陸離不如經營目所睹还騮駟駱駢駮騅  
長林豐草適馬性撒尾頓足乘涼颺香沾苜蓿宛鼻語  
渴吻遇水翻長嘶平岡綠蔭儘休息指顧六匹生雄姿  
獨有二匹忽拗怒任前舉後相逐馳柯庭愛馬具眼力  
辨別意態分毛皮向來藏弃穆之畫所以落筆皆週知  
嗟哉天閑萬匹豈易見安得曹韓復出指授爲吾師  
汪玉輪以淳化閣帖借觀并惠毫筆十矢助我  
臨池之興感而賦此時甲戌立春後二日



草廬岑寂歲逼除巷無結駟猶林居樵蘇未爨忘盥櫛  
惟事博識名賢書時當陽迴氣不肅細雨如埃沾草木  
方謀借帖比荊州推戶俄驚立銀鹿緘書未拆喜躍然  
墨王什襲開床前紫毫湘管還割愛贈我落紙揮雲烟  
嗟余濩落何足齒對帖懷慙汗流泚年交五十髮早衰  
此藝安能副知己仗君鼓舞且苦攻硯瓦磨得隄麋濃  
左旋右掣試腕力一雷驚起池中龍

是時震發巽方戲及之

送汪晉賢佐郡桂林

丈夫經世心所操讀書萬卷基高牢學優而仕展驥足  
寧肯委翅棲蓬蒿素推桐溪汪叔子孝友已足佩呂刀

宵中之才可補袞文彩絢爛絲新纈迄今 朝廷當盛  
際薦揚不待夔與咎念深榮親出膺選從容賫牒投銓  
曹粵西得郡亦意外半刺佐理何辭勞于時匹馬去國  
門暑蒸雨汗淋青袍歸將奉母到官所奈觸瘴霧驚瀧  
濤連枝總屬左右手鼎饌供養餘豚羔臨岐小心拜堂  
下裝囊結束登輕舸隼旗翩翩向南指親朋餞送江之  
臯離陽此行四千里風起挂帆灘運篙荔枝枕柳映斑  
竹蔽虧峽岸啼猿猱想從蠻徼下車後導以忠信除貪  
饕珊瑚翠羽奚足貴課督耒耜寬田毛日親案牘得少  
暇搜括靈境資風騷嘗觀范公桂海志采錄巖洞無藏

逃千峯林立起平陸翠筍斲削鏡天高丹崖石堂咏不  
盡松籟髣髴傳雲璈文詞發揮正賴此得非山水之所  
遭余生雅有濟勝具老眼依舊明秋毫公餘詩卷儻寄  
覽况追賓從同遊遨

題汪玉輪撫劍小照

曩余得古劍匣藏如密友瑩以鸕鶿膏摩挲不去手未  
識鑄者爲何人篆文隱約蟠科斗試之鋒利能吹毛吐  
出虹霓射林藪誰將指頰景孰用掃昏霧無力剗塵象  
何心切瑯玖電霆白晝纏四壁木魅山精俱却走隨身  
十餘載索價羞開口世閒何處無英雄出門萬里人難

逢歸來窗下引杯看土花鏽澀塵埃封豈知汪子說其  
劍恍然不與余劍同多年淬礪光耿耿變化欲敵延津  
龍惟以仁爲鍔惟以義爲鋒禮則爲脊鐔爲智以信爲  
鋏無終窮一朝借之得際會風雲只在掌握中如斯學  
術真奇偉筆陣縱橫可摩壘鍊成文章即干莫國士相  
當定披靡嗟余抱劍終何俟枉托肝膽求知已不如銷  
作耨與鉏用芟稂莠除荆杞子以我言優余謂君說是  
他時兩劍決雌雄莫笑老生重掛齒

題張靈文壁畫鶴聽琴圖合璧卷

翩然孤鶴仙家禽引吭斂翅梧之陰梧陰如水涼匝地

中有一士為錢友琴彈素琴鶴不能言聽其側領畧萬古無窮  
音流泉淙錚激石齒萬竅發響風生林琴非用指終不  
鳴宮商徵羽何處尋此圖張靈之所畫特畫琴鶴非無  
心斲菴葑谿桃花塢題識磊落爭奇嶽衡山技癢出三  
絕合璧裝潢傳至今雖無東橋續作記顧尚書璘作友琴此記未果見其跋語  
卷珍重踰瓊琳向來流傳好事家歲月寢久幾銷沈那  
知悉歸柯庭手惜哉不獲摹與臨連宵有鶴形夢寐玄  
裳縞衣口不啗桐陰請余彈別操尚記軫玉徽黃金

馬子白七十誕辰令子扶曦索詩為壽賦此

憶余弱冠識翁面花竹翎毛披素練暨從壯歲登翁堂

露草秋蟲看紈扇連年作客塵滿衣白雲林壑歸來稀  
翁之畫圖况在眼一花一草爭芳菲三吳幾人能鑒賞  
欲求尺幅空懸想不將衣鉢付他家有子聰明世無丙

勤中

王武正叔

惲壽平

各擅名能括造化揆菁英每驚賢嗣

藝早成往往落筆天機精筆姿年來尤活潑徐黃妙處  
力能奪生綃十丈不給用萬蕊千枝縱塗抹阿翁抱孫  
飽看花手傾脂水暈鉛華春風拂拂吹几案蜜蜂胡蝶  
喧簷牙詰朝翁作做七十壽會當釀錢進卮酒酒酣齊  
唱踏踏歌十里西郊開梅柳

王氏園牡丹

洛陽名花邇來盛花逼殘春發豪橫紅黃紫白累百種  
或標地名或以姓移栽易地則皆然更異花繁江浙境  
平時澆水換花頭置棘預防霜力勁硫黃一七填蠹穴  
不使多年根撥病人工端能奪天巧坐令造化空持柄  
王家新買花數本露洗花容甚端正枝間斗大四十朵  
剪出紅霞葉交映鞞紅茜袍福嚴紫一葉花開若爭競  
上褰繡幄下開筵歡賞窮晨還入暝紗籠樺燭影亂眼  
洗觥再酌分題咏遮留不住春歸意暗裏差排花作膝  
五更急起棟梢風狼籍香塵滿苔徑信知富貴總須臾  
一喚世間塵夢醒安得徐熙沒骨畫索寫花神即持贈

題汪柯庭撫琴玉照

余素不善琴粗辨太古之遺音每當下指時恍若水穿  
石竅風生林又聞牛鳴窟中雞登木一彈再彈洗我  
煩心年來兩耳慣被箏笛使倒顛商宮角羽徵有琴空  
裏破錦囊金徽玉軫無人理世閒解得琴中趣誰似平  
陽汪季子即今貌出撫琴圖先置此身邱壑裏先生不  
知移我情僧繇點筆天機精欲揮五弦復停手目送天  
末飛鴻聲但見蕭樛樹葉脫未盡秋江渺茫一派煙雲  
橫

跛驢行

臨淄覓驢下荒店二客一僮來異縣店中恰有驢數頭  
令我手脚輕欲旋北人見我南人喜急炊胡餅羅韭莧  
豈圖大嚼過屠門舉箸加餐看驢面茅檐此時日已晡  
毛骨辨別非模糊數驢之中揀其四意欲跨上呼童扶  
籠燈寫券待明發如干雇值交青蚨遂牽槽邊加洗刷  
秣以大豆和青芻劇憐奴子勤不懶又捧槃匱供漱盥  
解衣遂就土炕眠譙樓更鼓搗聲亂誰知北人最奸狡  
牽取他驢暗中換黎明催共束裝起尚見絳角星河爛  
初時騎出行步徐引韁預避騾牛車一驢鳴鐸作前導  
稠載囊笈并琴書二驢中行我殿後始怪病腳多趑趄

行行十里辨榆柳等乘跛鼈逢崎嶇回頭詰問執鞭者  
亦復粧聾還做啞迢迢大道暗風沙飛揚跋扈皆良馬  
使余宵次添抑塞未甘老氣輸人下前途五日那浪程  
十步九蹶身欹傾小心收韁越溝塹卒然屹立鳴幾聲  
迎風垂耳噴鼻息衆驢不肖同隊行轉加箠楚轉遲鈍  
具此劣性殊難名及當日斜望棧阜始放蹄鬆踐煙草  
我時勞頓坐無力不虞一跌和鞍倒悔無張果倒騎術  
空摺白驢存畫稿驢兮驢兮奈爾何陳搏也隋華陰道

題邱邑宰黃韞菴明府哀漳河詩卷後

西門豹鑿十二渠用以溉田引漳水當年民齒賴其利

功被萬世徵諸史東昌屬邑古丘邱境接漳河七十里  
築堤襟束慮水患往來相度無傾圮爲民父母能宣勞  
我于賢侯首屈指不虞淫霖積晝夜暴水泛濫如神使  
役夫工費井填雪四十八邨歸渺瀰紛紛老弱棄屋奔  
粟甕麥困捐水底牛驢犬豕聚高阜木末無罾捕魴鯉  
侯時蒼黃望空禱瀝血書詞翻罪已河伯以之頓斂威  
連日東移竟西徙遂乘單車出城覽日色荒荒照荆杞  
區分疆畝辨溝澮轉否成泰憂成喜肩擔襤負各送家  
慘淒幸免生鱗尾急呼投牒州與郡發廩拯飢莫先此  
郡中捐俸給丁口如病得藥蹶然起入秋種作復改觀

堯田十化膏腴矣餘惟省刑減稅斂簿書鞅掌分條理  
坐令謳思播近遠感侯慈惠無時已吁嗟寰圉民牧多  
兢慎誰能有終始食君之祿在必報若此允稱無愧下  
願將嘉政勒諸石儘費松煤搨千紙流傳輦下羣公卿  
并達明堂 聖天子

紀異

癸酉六  
月中旬

淫霖匝月陽氣渙屋柱菌生礎流汗黑風吹樹錯昏晝  
簷溜牀牀亂淋幔空中有物勢蜿蜒霹靂驅之遠逃竄  
水高平地二三尺車馬通塗人跡斷漳河衛河水驟漲  
百姓蒼黃築堤捍豈堪山東方被災又報江南遭亢旱

由來天用莫如龍曷不變化分靈蹤我欲奏綠章精誠  
枉填胷東南連郡田百萬稻苗焦槁將傷農雲霓渴望  
刻難緩神龍效職應當從龍今何由聽我語不返深山  
蟠水府隱然乘我思恍忽王者冠珮來庭宇我知爲龍  
遂趨揖復告此事言覩縷迺云行雨各按方敢抗帝命  
私爲主但今旱潦幸可挽移此易彼晴爲雨時余聞之  
喜且驚雷電風雨摧軒楹須臾雲霧涌之去鱗爪閃爍  
迴雙睛余非葉令卒致汝是夢非夢何分明閉門蚯蚓  
槐日午天色清朗炎飈生頗欣此徵殊不惡臆料神靈  
不差鑄爾龍誠能禦災患真是一呼而應諾捲却山東

雨遍回江南洛兩邊禾稼致有秋億萬蒼生出溝壑從  
教廢粟積太倉眼中永睹田家樂

太白酒樓歌簡濟寧牧吳圻青使君

吾慕李太白爲歌酒樓篇緬懷舊蹟恍在目最是溧陽  
酒樓三月天楊花撩亂愁殺人有酒不問囊中錢千杯  
飲盡兀不動道旁堵立驚神仙木蘭柹沙棠船陳鐺杓  
列管弦浩然乘興泛夜月丹陽湖畔樹影濃于烟後遊  
金陵縱憑眺虎踞龍蟠雲繚繞昔年宮殿化爲塵六朝  
脂粉餘花草愁來酒多澆亦得白也風流猶未了仰天  
大笑看酒星孫楚樓空無故釘不如采石磯上捉月亭

江濤衝突崖根青仙人錦袍騎鯨出怪余獨醉還復醒  
狂吟太白詩草木振動魚龍聽衝風一何速鼓浪如銀  
屋我時呼仙人舉觥薦秋菊菊既馨酒仍綠申浩歌送  
遙目九華之秀可攬結黟山雲外羣峯矗下有小桃源  
名爲樵貴谷所以新安有酒樓千載無人繼芳躅酒樓  
歌歌未足手中綠玉杖曾上齊雲麓奇哉太白到處逢  
酒樓結構多玲瓏大江以南探欲徧抽帆更使長淮風  
黃河渡過適齊魯泰山一抹青浮空欲尋竹溪遊約是  
徂徠東爲求賀老勸觴處濟陽酒樓高如許炎曦度涼  
颺舉導載設琴在御延陵使君蒞此州領袖詞壇足高  
樓快意亦足供吾遊

松泉四老歌贈蔣仲懋

蒼崖拔地松含風飛泉噴薄仙源通能將四老置邱壑  
畫手豈得非良工人閒畫家亦無數未合規繩和矩度  
獨披斯圖發長嘯氣味恍然歸太古一翁幅巾膝橫琴  
水流山峻饒賞音新弦未調舊弦解金徽自得彈時心  
一翁手倚靈壽杖瘦聳吟肩動玄想神仙縹緲睨東瀛  
花木十洲如在掌一翁雙髻白雪如偏袒右肩方掩書



山僮按摩搥脊四體筋骨皆伸舒試觀三老多百歲  
碧眼逢人走精銳中有一翁更矍鑠識是九侯之苗裔  
冠猶緇布衣薜蘿口談丹訣如懸河山中紫芝光曄曄  
長鑱斫取還高歌歌聲欲起商山皓雲養石根三秀草  
服之壽與天地齊世上英雄何足道

題王圓照倣巨然畫

國朝東吳稱畫藪祖宋禰元多好手婁東首推王奉常  
匹敵更有廉州守此幅運思追巨然樹石參差氣雄厲  
蜿蜿沙路入林霽落落人家占山口經營慘淡合古人  
絕去市俗歸清真雲從虛處滃然起鬆快或閒藤皮皴

扁舟 葉畧北綴荻風吹動波鱗鱗筆端靈妙有如此  
世上碌碌嗟餘子黃塵京邸浪馳逐白髮侯門供役使  
誰知物以希爲貴不是雌黃諸畫史題成請賞實堪笑  
定信吾言非謬矣

乙丑秋錫山華義逸繪綵鸞寫韻圖壽余四十  
雙誕嘉禾周青士暨余同里陸覲菴嚴武伯  
後先倚韻贈詩迄今丙子已十易寒暑矣翰  
墨風流宛然如昨而諸子相繼謝世不禁泣  
然感歎率筆次韻以識歲月

仙家伉儷世希有文簫綵鸞殊可人日書唐韻出纖指

賣錢自足資琴樽誰將扇畫縮咫尺華子筆底真通神  
人閒安得此良偶讚嘆詩筆空超羣大凡世界多缺陷  
擇對豈得追前塵古來登真不爲渺茫事枯枿往往花  
迴春嗟余五十頭皓白中夜養氣歸於醇爐心石爛未  
斷火松底芝茁方蒸雲詩成笑倒箕箒婦頑面早皴雞  
皮文

下榻履硯齋次黃圭菴見貽詩韻兼呈汪柯庭

昆玉

丹楓黃菊映草坡進舟桐水歷覽多來過硯齋交冬候  
頗喜人氣殊溫和有曾懷塵滓蕩滌盡習靜恍在巖之阿

廿年主屢咲闊慰勞惜我行關河座中叔度慕已久  
學問氣節聲相摩連朝酬對水乳合天下樂事真無過  
文詞竊恐歸委靡友朋所重加磋磨調同忘冷不遺下  
可奈鬢髮如余何竭來圖史歸舟載難忘雅論思丰采  
竹榻燈殘役夢勞茅廬詠罷添人慨詎肯悠悠逐衆流  
冰霜松竹心長在

初渡黃河二首

治河衆議付悠悠勝國曾推宋與劉

宋尚書禮劉尚書大夏

慨昔質書

求故道幸今設策使安流東堤萬柳連官驛開插千櫓  
放漕舟定有偉人收異績上京真倚作咽喉

海東集卷五  
屢興疏導事良艱國帑措撐豈等閒薪石廣儲夫役備  
舳艫逆上水程慳橫流早緩青徐界散勢多歸淮泗閒  
翹首茫茫增浩歎林菁落日下荒灣

題李鯨使重創歷下亭

軒蓋聯翩有客從斯亭重創洗荒蹤天低分野當危宿  
山盡歸雲擁岱宗廣陌柳長堪散馬春犁雨小不妨農  
遶闌欲礙千迴坐下有明湖影蕩曾

寄題吳門郁氏延翠樓兼簡周魯菴

一樓高欲出城隍開拓曾懷正在斯想得樹分吳苑外  
攝來山直太湖濬憑虛景象天然妙過眼烟雲日益奇

欲擬憑闌延爽氣只愁崔顥預題詩

江天寺次邵青門韻

天晴鰲背湧樓臺屹立江心勢壯哉借樹溝魚開鶴唳  
迎潮飛槩渡僧來浪花散漫風旋作石勢欹斜水倒開  
每過山門真隔世塵中擾擾使人哀

送姚武功之瓊山幕

天末瓊臺萬里長羣山環拱海爲鄉路經異域何時到  
詩得高人未可量日午涼陰榕樹綠雨餘珍果荔枝香  
賤軀送子無他囑辟瘴須儲藥一囊

蝸舍

偶營蝸舍寄城闈得飽粗安居士身門徑有時霑細雨  
芳菲漸次入深春小桃花豔成尤物百舌聲多類佞人  
寓目總無憎愛相邇年方寸斷根塵

和曹祭酒峩嶺先生六十自壽原韻四首

幾年劒珮肅鷄行白髮聲華溢 帝鄉史館竹梧曾傑  
直詞林風月舊平章稱觴香動梅花榭度曲鹿翻燕子  
梁若起謝公深慰望台星江上爛生光

自挹清標兩載餘遠崇垂問道旁樗已看枳亦用官泊

復羨耆英曾不虛

先生與素對周絨齋兩公同庚

雙屐烟霞添此老一竿

天地首名漁年來洞府搜奇帙可似人間溷魯魚

近注老子度人

經未竟

舉家學道事清齋餌木餐之箇箇皆

先生嗣君俱好玄學

松遶飛樓

羣鶴降雲晴碧海衆星排珠璣自領淹賓舌同意難心

下士懷為頌九如容點筆願將崖石蘚痕揩

柳鞦鶯嬌花欲憨春風八杖及時堪 朝廷念舊方虛

左騷雅多師幸指南只負前期成鷓退敢言芳餌就鮑

貪蓉城帶水函關遠紫氣朝來早識聃

咏蟬

巧弄泥丸用智精一朝變化舉身輕綏垂露葉趨高潔  
響厲秋林若沸羹曹植纏綿遺賦格蔡邕錯愕辨琴聲

南朝柳陌添惆悵只爲貂冠爾有名

中秋後一日秋原招飲浪齋剪燈話舊得坡字  
虎阜笙歌掃跡過浪齋今夜興如何風輕蠟炬生花小  
雲薄蟾輪散暈多飲到開懷猶沃雪談當縱口若懸河  
臨行忽動悲秋思露冷螿鳴草滿坡

謝公言大令送薪炭

臘天正擬措烏薪分惠深慚厚意真噓植山林迴暖氣  
斡旋蓬蓽變陽春感喻挾纊思寒士坐得匪爐兒由以  
始識孟郊詩筆健當時價重比雙銀

東野詩有贈炭價重雙烏銀暖得曲身成直身之句

題張石樓畫櫻笋便面

憶逢櫻笋撥歸橈從此張郎會晤遙不分虎邱看扇畫  
別魂爲爾黯然銷

題王西樵清江斂艇圖

江水秋來欲接天浪掀一葉打魚船偶然撐向蘆葦裏  
撥漉羣鷗入暝烟

題余荀若畫桑蠶便面

園桑摘盡已非春食葉吳蠶貌得真若使飛蛾來扇底  
也應識得是前身

鄰翁邀嘗新笋

折烟束露早充盤拾籜燒來勸飽餐願擱長鑱休盡取

好留清夏看檀欒

緋桃

緋桃開徧壓牆花豔吐千枝鬪晚霞舉餞却愁燒破眼  
賺人喫酒做樂巴

春風

弄巧封家十八姨搓成柳線繡桃枝問伊會換顛毛否  
願乞青青染幾絲

春雲

卷舒不定度花陰道是無心却有心每值樽前唱金縷  
一絲裊裊戀餘音

桐溪鞭影菴度夏紀事二首

梧軒長日對楸枰臍膊時聞下子聲休恃心兵鬪先著

大家和局免輸贏

皇甫八立與邵生圍碁

睡魔戰退紫茸香捲起桃笙掃竹床解得跣趺逃暑氣

道人水觀本清涼

時閱古尊宿語錄

題畫

寒葉辭柯潦水收江天釀得十分秋亭空無箇綸竿手  
閒殺忘機兩白鷗

馬扶曦畫梨花

屏除脂粉換新妝覺得春光畫裏長好似那家深院落

溶溶月底罨花香

題根和尚還山圖二絕句

瓢笠飄然道自尊  
遨遊朱邸若逢門  
秋風吹動還山興  
黃葉江南又一番

北秀南能各立宗  
一條拄杖活于龍  
急流勇退今誰似  
菴在東林紫翠峯

滴滴金

秋霖滴滴點成金  
類若空招蝶使尋  
遮得貧家門面好  
不妨人動覬覦心

金錢花

團團輪郭肖錢形  
訝道秋陽冶鑄成  
喜爾本非銅臭質  
不妨人喚孔方兄

秋牡丹

秋欄忽見牡丹身  
色相看來彷彿真  
若向春風爭國土  
此花合作附庸人

蠶婦怨二首

養蠶令飽莫令飢  
桑葉挑多禿盡枝  
賺得婦姑心力憊  
何人曾掛一絢絲

蠶過三眠葉罷餐  
做成繭子也辛酸  
委身湯鑊耐恩養  
却與他家織素紈

鈔國語苦雨窗昏暗且乏薪舉炊二絕 乙亥

日晏茅齋未舉炊撼窗風雨樹紛披眼昏未敢閒雙手  
夾注鈔書且忍飢

數口嗷嗷仰硯田食輪轉即動憂煎麥淹秧爛漫大雨  
莫做康熙十九年

盛筵

旨酒珍殽設盛筵當餐三嘆值荒年可知每頓卹厨費  
措得貧家累月錢

題欽遵一畫烟寺晚鐘

叢林鐘吼白雲層哄動諸方行脚僧咫尺畫中標淨界

頓令迴念到三乘

題墨蘭

迎風啼露各芬芳吐氣真爲王者香定擬當年鄭隱句  
不將寸土畫根旁

過古南禪院贈乾一和尚四首

趁得楓林秋氣澄扁舟過訪興飛騰山僮候報稀奇事  
一杖扶來有髮僧

十載三迴到卧軒逢人無箇可寒溫天童一脉方衰替  
幸得乾公作嗣孫

落拓東西南北人遊方隨處率吾真只今黃葉深秋院



彌勒同龕幸此身

更深不覺話言長撥著爐灰芋栗香念到舊交心作惡

子期彫謝呂安亡

謂周青士沈  
山子二君

海粟集卷第五

海粟集卷第六

拾遺

仲雍山人 顧文淵 雪坡

庭桃歎

十五  
歲作

中庭不數武有桃亞橫枝膚理狀鐵色穠葉日以滋平  
生最取譽惟在花開時紅白飫人目無言若含辭結子  
入秋熟味勝橘與梨憐伊種多年氣力潛改移况兼土  
磽瘠燥濕兩失宜蟲蟻穴其腹苔蘚蝕其皮流膠淋漓  
甚枯瘁不自持欲求返厥初竊恐計已遲凡物在所養  
豈特茲桃爲緣此感窮士淚下如縷縻

陳子兼見過別後却寄

閉門覓句自陶情念及荒齋枉駕行深感布衣交有道  
苦無樽酒話平生墓堂飽聽長松籟華表應聞老鶴聲  
落木空山當一枕此詩真不負君名

題滄漁圖

如此爲漁實罕儔一舟之外有何求讀書每盡三更月  
濯足應須萬里流震澤水清詩國夢嚴灘樹老釣臺秋  
朗吟只占蘆花畔猶恐盟寒鷺與鷗

重九後同沈秋士放舟過潘氏書塾

商飈弄其威早與草木競同舟賴吾子聯詩敢無興所  
歉筆端力未免分弱勁離城不十里一里一奇境霞濫

楓葉穠鷗喧荻花淨溪流清澈底鑿物無遁影遐邇共  
延目幽趣悉飽領以茲誇主人亦足助談柄今宵到書  
堂勸飲一惟命師範固須嚴酒兵宜各整令伊子弟行  
低顏奉觴政不然滿軒菊重九虛節令

聽單榛屢彈琴

孰洗箏琶耳來聽撫七弦雅聲傳八鬼古法合三賢雲  
護龍吟壑松邀鶴啖天真成有道器一往意悠然

乞巧日

巧自何來拙莫論林蟬嘶噪反闔門腹中自笑無書曬  
且挂竿頭犢鼻褌

懷尹畊野

尹子誠廉士貧無地卓錫獨將清業守一學古人爲屋  
破牽蘿補厨荒數米炊莫憂名晚立久困老天知

歲除前二日飲衛于天城南草堂

不用爲文送五窮一堂談笑豁心胸殘年似客纔言別  
良會于人豈易逢老樹撼風寒尚緊狂雲釀雪夜尤濃  
杯長未免淹深坐報道僧坊已打鐘

羈旅行寄內

出門別鄉雪花白浩歌長林獨攜策江船峭帆縣界過  
長亭短亭楊柳多酒家年荒屋俱壞風裂青旗無酒賣

爲謀衣食拋鄉園心銜悽楚從誰言幸逢新交如舊識  
人前推獎皆相得屢更館舍費雞黍醉月吟花卧聽雨  
此時縱起離家愁何路尋鄉夢中語人生今日知苦辛  
孤負堂堂七尺身翁姑囑爾奉養好莫因遊子增衰老

畫竹贈汪季青司城即倚來韻

何必淇園與渭川茲遊隨處竹娟娟一林經眼看終日  
千畝藏胸傲昔賢風入叢梢雲影碎雷驚初筍蘚痕穿  
寫成聊比琅玕贈不覺秋聲起硯邊

旅次感懷用周青士韻時有山林之舉甲寅

閩蜀曾聞半被圍天戈到即返斜暉讀書不意關戎事

應 詔何人起布衣長路草荒騏驥病重闕塔隔鷓鴣  
飛 廟堂所急餘公等高卧山林計恐違

哭尹畊野

人言君死盡與悲在昔淒涼我獨知抱病七旬堂上母  
啼飢六月祿中兒雨淋蝸篆荒苔壁風折烏栖舊樹枝  
惆悵無端成永別一牋空剩落梅詩

君之絕筆也

寒夜聞雨

怕聽檐溝點滴聲愁人心碎夢難成只求化作漫天雪  
明日看山縱酒情

臘月雨夜宿馬小山林亭

殘冬積雨費招尋喜有林亭散俗襟遊說欲憑三寸舌  
風塵未遂十年心綠沈槍動梨花冷

君善槍法

縹粉壺傾竹葉

深飲到微酣共惆悵牀頭只是乏黃金

春雪凝艷體

記得楊花小院春樓頭如雪雜歌塵今朝風景依稀似  
掌上輕盈少一人

次韻荅項東井見贈

平生風月有情癡敢比吾家老愷之柳暗蠡湖曾快晤  
花穠吳苑輒相思斝樽醉遍僧軒酒紈扇題多妓席詩  
擬訂來春續殘夢東西蓬轉尚無期

海東集卷六  
冬夜邵青門招集靜寄軒因病酒未赴次來韻  
敢負良朋折簡呼昨宵醉後此心孤耽詩瘦沈應添瘦  
嗜酒迂辛更覺迂籬落雪消梅畷綻牆匡風捲葉聲枯  
朝來滿卷投珠玉愧我探囊一字無

苦雨

家貧何計穩山林日聽檐聲白髮侵曉起軒窓遮樹暗  
濕炊甑釜罨烟深麥畦負彼辛勤力米市生渠兼并心  
未解蒼蒼是何意嶺雲鬱勃反添陰

題楊子鶴歲寒圖贈樂山上人

現前諸相出毫端松竹茶梅記歲寒寄與山中爲供養

問師先揀那枝看

自題僧衣小照四絕句

屢依雙樹聽三乘頭髮難除老自憎一刹那閒沒思想  
願將居士替爲僧

本來心淨似蓮華出佛何妨更入魔禿盡顛毛吾負汝  
今朝畫裏著袈裟

平生土木擬形骸老去狂名肯便埋安得慧澄新繡佛  
豬頭米汁共長齋

袈裟稱爾畫中披肉眼相看盡凡疑始信古來尊宿語  
出家將相不能爲

再和前韻

願輪垂老始能乘舉俗休將頂相憎留得吟顙白于雪  
山林不拒在家僧

不消天女散諸華策進禪關伏衆魔誰施白雲安歇地  
它年試展大袈裟

平生詩苦瘦筋骸山水靈蹤發瘞埋十載歸休離熱惱  
香鐙禪榻穩長齋

跌坐如鐘古衲披有身翫世了無疑分明傀儡棚中戲  
線索停時用底爲

題自畫懸崖竹

懸崖白雲橫上未識其頂有時清風起放出蕭疎影

賦得飛鴻響遠音

候鳥離榆塞來賓朔氣深嗷嗷聞衆口隱隱遞哀音度  
水疑柔櫓經邨和暮碁風長聲不斷路遠力難任已避  
虞羅巧徒勞弋篡心悠然嵇叔夜目送獨橫琴

秋柳次王阮亭先生韻

逸前  
二首

羌笛吹殘淚濕衣看來態度較前非憐伊病得纖腰瘦  
類我愁多鬢髮稀霧抹疎林收影去風掃零葉作團飛  
回思搖曳鞦韆院海樣春光夢不違

渭城灞岸總堪憐銷盡涼風與暮烟萬種柔情餘婀娜

千絲離緒奈纏綿  
淚拋珠顆無多雨  
眉減螺青又一年  
帶累芙蓉抱香死  
誰教種向舊根邊

太白酒樓

時客  
溧陽

欲向人中覓謫仙  
酒樓無復是當年  
我來此地攜樽酒  
依舊楊花三月天

東野詩石

舊在唐興寺之薔薇亭  
宋崇寧中溧陽令李巨命其子  
誨民書刻筆法遒勁  
明正德間邑人狄郎中冲移樹於

史氏之圃亭曰紅  
香摘詩中句也

紅香亭畔古碑殘  
字畫依稀剩舊觀  
當日昌黎曾下拜  
後人誰敢論郊寒

猛虎行

烟霏微雨淒其山  
中虎跡新印泥  
禽聲錯疑鬼啼爛  
斑斕石如虎坐官軍  
一見弧矢隨  
豈知真虎亦畏人  
今日人心猛于虎

林協能將還閩中同陸敕先韻

閩嶠兵氛息  
看君旅思開  
不聞耆舊語  
每愛弟兄才  
竹冷陳蕃榻  
荷香袁紹杯  
那堪遽云別  
江柳暮蟬哀

歸燕

為協能  
兄弟賦

倦羽差池夢欲歸  
頽風頽雨路依稀  
尋巢自有雕檐在  
掠水休疑蓼岸非  
關外竟誰誇  
不領國中依舊見  
烏衣應知鴻鵠摩霄志  
不肖尋常命侶飛

齊宮

十二門前樹影微景陽鐘動月，  
和輝六宮粉黛妝初罷  
報道君王射雉歸

陳宮

景陽宮井污胭脂玉樹聲沈最可悲  
應愧宮中袁學士  
諫書當日是新詞

贈王石谷次漢陽吳相國

賡庵韻

墨壺翻却興淋浪老樹巔崖遠勢長  
幸有大癡衣鉢在  
湖橋烟月未荒涼  
不妨畫隱髮蒼浪  
王宰名傳海內長  
賞鑒只今逢相國

炎天林壑沁人涼

寒夜華及堂懷周青士

頗適讎書意  
郊堂竹木清  
試燈寒夜席  
警柝雪天城  
往復能無札  
週旋悉見情  
近聞新病起  
孤棹望西行

和伏波留別原韻

勸爾一杯酒要君詩興濃  
經年為遠別此夕得相逢  
座煖鑪存火林昏寺打鐘  
小梅花信蚤新歲望過從

畫竹石呈大中丞商邱宋夫子

牧仲

石是平泉薛跡重竹分淇水綠  
法濃畫時遙仰為霖意  
硯沼須臾起螭龍



瓶梅

和金東  
阿韻

折取梅枝插膽瓶縱橫位置儘  
多情畫中攝影生來瘦  
硯北分香鍊得清愛爾自矜冰  
雪韻知余暫締歲寒盟  
博山未敢熏沈水次第花開著  
眼明

鶯

綠陰密處小巢安  
哺出新雛羽已乾  
切莫枝頭教簧舌  
有人施巧引黏竿

憫荒

吾鄉遭水荒湖邨更淒楚  
八月無稻穫九月無場圃  
家因凍餒屢有逃亡戶  
寄命蘆葦中爲業在網罟得魚

入市賣換米救窮肚殘喘真苟延  
所急在空釜况乏遮  
身衣西風吼林莽繫我何爲者  
嗟惋力無補行行詎敢  
前日暮慮有虎久不踐斯境  
茲來不堪覩孰能急賑之  
此輩苦復苦

過汪東山齋讀其新詩同緯乾舍弟韻留贈二

首

少年負才藻奮志遂所欲  
當時親知閒靡不心相屬  
驥驟升天衢萬里方展足  
回視轅下駒能無傷局促  
寒困冰雪棧飢分鳧雁粟  
人而窮至此哀鳴徒駭俗  
所以投瓦礫將圖引珠玉

雲泥固分定造物亦待人吹之則成秋噓之則為春聯  
翩觀時哲衆星拱北辰文辭發元燄四海奪目新嗟余  
老蓬華苦調非無因撫琴污清聽冀挹君子塵

題蔣西谷墨竹

此枝渾疑鑄生鐵不怕北風常凜冽固宜貌取贈幽人  
獨向空山抱清節

雨夜孫孝維西齋醉贈凌秋渚

雲歷西簷不放晴張燈角酒下三更語當快意宜捫舌  
飲到狂時六縱情引架藤梢添夜色覆欄蕉葉作秋聲  
詩成細看榴皮字真與回仙可抗衡

秋渚善草書  
兼精針灸

岑公將歸洞庭同周青士賦此為贈

鸞鳳銜羽翮豺虎布牙爪蒙龍荆棘滿路岐天地局束  
傷懷抱吾曹甘守山澤閒奚為不樂彫朱顏王侯螻螻  
同一盡象外視之真等閒文儒勲業嗟已矣出世壘見  
名家子岑公才藻晝徹徒衆流莫敢窺涯涘偶懸梓里  
杖錫歸花穠柳暗春霏微禪心瑩若古井水纖塵不染  
壞色衣我同周郎苦棲屑怕倚冰山况趨熱兩迴得接  
松塵談禪床未煖旋云別揚帆兩日抵洞庭風吹蘭芷  
遞芳馨為公詩神輒恍惚七十一朶芙蓉青料知精藍  
在深樹蓮漏石燈安坐具自憐行脚頗有年安得從之

海東集卷六  
領其趣竭來毛生自四明丹青點染天機精貌余三人  
置岩壑題詩寧必留姓名雄飛雌伏互變化通塞從渠  
各趨捨紛紛笑殺濁世爭腐鼠烏爲何足嚇

題自畫竹

讀過昌黎咏竹詩頓令筆墨興淋漓數竿立向雲根側  
便有清風拂硯池

題扇畫梅花松竹

春風醞藉拂陶泓各自攜毫各寫生况似南屏山寺裏  
梅花香和竹松聲

賦得山水有清音

素沈山與水佳日恣登臨峻嶺微分路流泉曲繞林聲  
傳虛谷下響落斷崖陰遠籟隨時發真源是處尋雲根  
青壘壘潭影冷森森有象天然畫無弦太古琴久聽祛  
俗慮歷覽啓遐心樂此誠仁智頻來悟至音

題扇上竹枝

古墨香猶帶麝臍晨窓試硯滌澄泥清風拂面本無意  
吹得竹梢俱向西

和汪東山喜雨原韻

渴望雲霓解倒懸驟驚雷雨起龍眠倒掀江水從空下  
遍灑田禾未秀前簷溜適當煎茗候竹涼重結讀書緣

憑高舉目愁襟豁爽挹西山洵可憐

周耕雲以絹易畫竹

道人幽居度炎天繞窓花卉秋爭妍圖書之外四壁立  
一榻兀坐幾欲穿耕雲周生癖嗜古吾鄙每愛其人賢  
凌晨冬冬扣我戶手攜東絹白且鮮請余寫竹繼作歌  
急欲裝潢齋中懸拭我几案羅畫具陶泓毛穎兼陳玄  
豈知此輩東高閣因爾起廢寧非緣自嗤懶散怕應接  
恰喜舊幅餘長箋規摹文同兩叢竹位置片石苔生烟  
願野淺林竟易此庶免曠日難償填耕雲欣然捲之去  
且省潤筆青銅錢

題畫

陰陰竹樹匝清溪雲抹山腰直過西一箇茅亭據幽勝  
無人來此聽黃鸝

題馬扶曦荷花白頭

綠房翠蓋毫端現曾待吳宮美人讌莫怪棲禽白了頭  
秋風吹老荷花面

已卯夏五張凡臣攜尊就孫麗明竹深處賞茂  
葵酒竟賦此

孫郎業儒地世守半畝宮後軒竹千竿新梢甚青葱前  
軒葵百本直立猶麻蓬每逢蕤賓月吐花各玲瓏蒐羅

得其種灌溉奏厥功歲閏花特遲節已踰天中參差匝  
階砌絢爛偃簾櫳嫣然共傾心一笑日在東或若凝脂  
白或若茜著紅或若甚分紫彙成錦綺叢爰知人力勝  
造物羞云工勾引好事者孰與張子同謂花易攔珊飲  
客須忽忽行厨咄嗟辦官計囊錢空雞猪魚蒜屬梓饌  
儘足豐主人助之酒兩邊煩僕僮戶屢倏已滿四座談  
生風花亦喜衆醉意態加和融有詩倚酪酏思澀翻告  
窮長城五言在誰領偏師攻余先折花別天昏雨濛濛  
不知花滿手醉袂纏游蜂

慈封八景孫孝維索賦

嶺梅春曉

南枝動春暉北枝橫月影蚤起捲簾看駛雪冒層嶺

石池新雨

一泓浸雲根新雨日奔注潤及寸草心青青發無數

疎簾佛火

松楸暗疎簾石燈初上火廬墓逼三年緇經獨趺坐

天香夜月

巖桂自然香濃熏墓堂月寧知金粟枝分取寒蟾窟

滄海朝暎

扶桑若可攀日出海霞坼料應旋轉時永夜照窻空

兩湖帆影

東西分兩湖如鑑淨無滓千帆如落葉半在斜陽裏  
南巖秋樹

楓栝滿南岩秋深與春敵樹樹耀人眸絢爛非一色

三橋野店

野店起炊烟三橋走童叟誰家負米歸慈烏集荒柳

善會菴主聲公出六十自壽詩索和因成八絕

為贈

去儒逃佛事之常夢裏那將甲子忘一坐能銷六十劫  
請公推倒舊禪床

叢林結夏得真師捲起簾來境大奇佛法原來無一字  
會他三載更何為

退栖商畧白雲崖四大無端要活埋幸轉箇中關楔子  
翻然醉酒卧官街

樹下居雖第一流卓錫無地幾曾憂休嫌屋破勤脩葺  
有把黃茹儘蓋頭

折腳鐺中煮凍泉芋煨牛糞過冬天飢來隨分些些納  
莫結天龍供養緣

是身雖曰若浮雲夏葛冬裘一以保分寒熱年年能耐得  
空門何事不超羣

卷屬全家似虎寧哉田博飯不虛生果能和合無人我  
喫得園頭菜一莖

拄杖渾同道貌癯幾回落手發長吁見人何用雲門顧  
龍象年來半野狐

壬戌春夜同賀天山賀同菴俞犀月華義逸集

汪氏華及堂分得推字賦後復次和諸同人

韻義逸明晨別去

詞場領袖近爭推聚首溪堂喜舊知肝胆照人俱似雪  
風塵銷壤半成絲拚將鑿落斟松醞待展矍瑜舞柘枝  
不是鄭莊偏好客可能良會盡如期

張澄此夕會初筵罄折情深地主賢莫訝風塵為客倦

由來文字作緣偏殘梅夜月方聯袂細草春洲謾叩舷

時義逸  
欲別去

泝聚人生非易事樽前拚取各陶然

次和  
天山

故人舊闕讀書樓惆悵非君在昔遊

甲辰間同菴曾遊虞山  
余得邂逅于陳滄漁齋煮

茗支鐺無赤腳穿林調水換蒼頭

滄漁因嗜茶得疾  
茶具俱已廢置

久聞禽

戲窓中得遠愧蟲書柱上留

滄漁曾索書詩聯  
寄贈聞精內養術

誰道十餘年

一別異鄉杯酒挹風流

次和  
同菴

離合吾曹豈有涯相逢為勸祝倉華金樽既送深更月

羯鼓還催別院花泛梗竟忘身仕客聞鶯却惱夢歸家

顛狂文酒年年在如此襟懷枉自誇

次和  
犀月

春宵列炬照階蕪花月邀歡不可孤千古騷壇饒屈宋  
幾年兵略罷孫吳酒量東海傾知盡書比荊州借得無

飛蓋西園更何羨新篇蚤擬庾肩吾次和 碧巢

旅中底物把情陶賴有杯鐺屢見招花影拂牆燈畔見

芹芽入饌澗邊挑敢誇向秀能交呂祗恐桓溫浪薦譙

興至尋常惟竹路難忘問訊過東橋次和 柯庭

題汪柯庭勘書圖十首

寶書發篋吐光芒二酉搜來石室藏辛苦披讎忘歲月

春風帶草幾迴長

俗學紛綸肆力排古心真與古人諧名山蚤待千秋業

應百蛟龍夢入懷近柯庭究心 春秋之學

牙籤緗帙列縱橫南面何須假百城海內幾人能好古

披圖歛使寸心傾

秦火烟銷漢粕馨續來經術共千齡一時磨校開生面

頓似中天皎日星

天王袞斧尊磨史太極陰陽祕馬圖絕學千年露心髓

發揮應歎宋諸儒

丹黃不廢課三餘髮葉纖埃痛掃除縱有缺文難句讀

人間恐更少完書

篆銘尚有商彝考竹簡誰求晉竈觀奇字形聲無復講



古碑多半土華攢

爾雅蟲蝦疏舊註離騷蘭菝撥  
宋荻動將寸晷爭餘力  
博洽多君具此懷

歷朝史冊垂天壤  
褒貶能無隻字訛  
却怪後賢如斷獄  
是非翻案較前多

更有藏書出宋元  
紛紛校本據根源  
倘然偽種流傳出  
專待投膠救水渾

題汪庭柯翫鶉圖二絕

柱頰無劍脊冠纓  
白皙清揚點染精  
偶借鬪鶉爲戲事  
嫣然一笑破朱櫻

玉壺酒美引連卮  
不喚琵琶惱翠眉  
咏到黃鶉分勝負  
恍疑韓孟鬪雞詩

屐硯詩

汪柯庭者

端州產硯材抱晦  
在巖竇其深莫可測  
雲蒸漱陰溜交  
冬始椎鑿水涸免  
顛踣截出真紫珉  
溫潤若膚腠嘗按  
米氏譜佳者未易  
覲柯庭具眼力鑒  
物無舛謬謂有宋  
遺硯價重不輕售  
從閩隨端宗行殿  
供左右鸞箋灑宸  
翰銀箭傳晝漏倉  
皇歎羣僚封章日  
交奏烽烟混旌旗  
風雨侵袞繡幅負  
裂殆盡目慘邈北  
狩咄爾一片石神  
靈暗呵詬歷年四  
百餘至今留宇宙  
收藏易三姓顛末

已悉究購歸傾囊貨猶珠不脛走焚香設文茵鄭重出  
諸袖繩窮乃開匣光澤煥瑩琇天哉果端產款制謝雕  
鏤中凹外角剗毫不浣纖垢摩挲發三歎不鈍而得壽  
鳳味空望塵龍尾羞牛後自今楮穎輩夙願欣始副紀  
序贊銘跋隸楷草篆籀留題盡才彥同心若蘭臭斐然  
述顯晦豈被物見囿

讀汪柯庭哭子詩次韻奉慰二律

庚午

五齡頭角露贊歎付虛辭無分傳家學空生絕世姿情  
鍾王衍淚調苦孟郊詩莫向天公詰方當憤憤時

敢議西河慟曾爲負鼓人

去秋七月余喪  
穉子亦五歲

彭殤均一理電泡

喻諸身厚葬添松檜哀吟感鬼神倘逢吾驥子泉下定  
爲鄰

湯餅辭爲汪大司城作

辛未

煌煌木星精紫氛照嶽瀆在水生文犀在山產良玉所  
及應嘉祥方策豈虛錄平陽汪侯裔鐵券尚韞櫝累朝  
立勲業其始應必復余客江湖久聞見亦習熟天之報  
德門何用著蔡卜桐溪帶水耳十年余寓讀游君昆仲  
閒仁義俱佩服浪跡逐蓬梗別來兩寒燠附書無便郵  
夢寐常接續辱君屢記存春風送林谷果得充閭慶萬  
事有子足雖未會湯餅狂題筆鋒秃墨鴉塗數行冀得

副私祝試啼知英物容易鞠與育不願六國印不願八  
州督但令聰明到究取儒術速一聞威鳳鳴再見祥麟  
躅預開聚書樓芸香熏萬軸

山居雜興三十首次韻

十載遊韁南北東歸來顏狀笑成翁羲皇以上餘吾輩  
箕穎之閒挽此風如畫林泉圓昔夢入春烟雨奏新功  
有人問我山居樂口不能言指耳聾

栖山興到十分濃學道工夫不放慵嚮日悲歡隨逝水  
半生行止醒晨鐘尚湖老我閒垂釣阜廡何人再賃春  
試看梅花綠舊識吹香早已上詩筇

水供茗飲謝罌缸客坐移來傍石淙軟製鹿皮盈寸褥  
明鋪蠟殼向西窓聽松漸入通圓境禮像纔諳折慢幢  
陶冶性靈能洒脫白雲之外任驚瀧

憶到長途跋涉時居山始悟得便宜道旁苦李和花插  
谷口幽蘭帶蘚移自此消閒欣習熟素非趣熱悔歸遲  
其餘未免遭驅使醉向春風輒有詩

年同蘧瑗自知非吾道悠悠豈敢違桑竹一畦春過半  
饕餮數口歲防饑柳邊雨困鶯喉澀礪畔苔多鶴跡稀  
老我正須甘澹泊由來清瘦勝凝肥

百歲人生尚半餘書堆且復惜居諸打頭實稱三閒屋

脫髮常經一月梳身後姓名同草木編成問荅混樵漁  
客來好喫杯茶去塵世炎涼莫道渠

王門操瑟復吹竽那比烟霞養得癯簷額燕歸衝柳絮  
硯池蜂落抱花鬚綴文家自成機杼汲古人爭轉轆轤  
垂老書淫何濟用却輸脉望有良圖

筍脯魚羹菜作壘藤筐漆榼總提攜野花佐飲勝麤婢  
病鶴隨行當跛奚樹影平分羣壑杳雲痕欲截衆峯齊  
日長山靜從今始願作詩家唐子西

自笑平生筭事乖貯身邱壑始安排黃金傲骨經千鍊  
白髮狂名肯獨埋芍藥蕊將翻小圃篔簹梢又過幽齋

經旬破盡閒煩惱豈放情田動寸莖

幾許疑團打始開石泉新汲火鑽槐再聆波匿觀河見  
屢叩那吒析骨來大澤龍蛇多混跡叢林賢聖各成才  
世緣雖淺身難脫何日芒鞋破雨苔

曠世無人繼後塵青山爾獨與余親烟霞送作尋常供  
花竹分爲左右鄰導引圖中差著脚叅同契裏亦凝神  
早知幽事能稠疊何苦飄蓬負十春

得鹿亡羊付不聞此心閒比嶺頭雲倚欄荷葉齊擎蓋  
弄石榴英等摺裙詩恨專城無五字書慚入木不三分  
留名所繫秋毫末空博軒渠對夕曛

海東集卷六  
料無熱客且開門路出三义各有邨養就疎頑寧夙習  
斷除煩惱是陳根偃牆接葉鶯啼綠遶屋奔泉鹿過渾  
一雨衆山添爽氣坐令雙眼散眵昏

物外逍遙儘足懽何須雀躍與鯢桓戴逵隱處溪名剡  
李愿歸時谷有盤風過竹疑羣鳳下雲分石作怒猊看  
編書頗稱銷清夏盡日無人獨倚欄

叢殘舊草索誰刪碎錦無妨夢裏還邈矣風流空梓澤  
黯然魂斷廢陽關金蘭按譜成陳迹車笠申盟覺厚顏  
七尺綸竿差不負伴余吟到藕花灣

此身榮辱付于天滿鑷霜毛送老年有法安心寧作佛

無丹點石漫求仙儒衣僧帽前生事畫卷詩瓢宿世緣  
打出蒲團新境界始知甜勝蜜中邊

一邱一壑會心遙日午爐香撥未銷瀑水撼窓身兀兀  
松風到枕耳聊聊疎于禮法從人責窮取襟懷故意驕  
欲起當年黃子久試吹簫杖上湖橋

山中廓處謝譏嘲無用真同繫苦匏烏有能言憐鷓鴣  
蟲何送喜訝蟪蛄尋花雙屐殷勤蠟種樹諸書次第抄  
還願等身羅卷帙重標甲乙構成巢

颺颺作響沸松濤六月寒生欲系袍俗子正須當面錯  
惡詩直厭隔靴搔開門山鬼吹燈走竄瓦蒼颯嚙果逃

爲憶放翁當日句人因見嬾誤稱高

林風忽送嫩涼過暗促山衣製支荷未倦枕流兼漱石  
那辭附葛與攀蘿晴雲頓爾齊吹盡好月其如欲缺何  
此夜正宜河朔飲樽前醉倒喜無他

走遍珠林遇作家敢將一衲向人誇口頭漫拾顚頊句  
心孔須開智慧花清梵出雲穿密竹香燈入夜晃重紗  
諸天十地層層現柳粟橫肩路不賒

老顛不減少年狂觸景佳時覓勝場酒榼只消如斗大  
詩筇恰好過眉長貯來冰雪心源冷話及風塵舌本強  
人若誚余姑妄荅學圓難得且隨方

了無痰疾覺身輕竹屋秋深夜氣清學悔缺疑攙臆見  
事徵前謬折衷行琴徽懶按宮商叶茶銚閒聽水火爭  
老我山林何不可白雲端的有長情

夢入江山不斷青迢迢萬里快揚舲吟殘秋柳仍春柳  
歷遍長亭復短亭風浪驚隨漁父笛車驢避却媚兒瓶  
醒來失笑身疑客開戶涼蟾下竹汀

結交難定歲寒朋木石同居少凜兢座缺清言思樂令  
雲開長嘯荅孫登侵尋蒲柳姿如許收拾桑榆力豈能  
一著贏來甘寂莫六時蓮漏在家僧

薄暮喧唳鳥雀稠稻堆高欲並山樓經寒敗葉隨風捲

海東集卷六  
作雪濃雲貼樹浮侵夜撥爐先熨被凌晨呼酒再扶頭  
天公倘許圖安穩敢向窮冬浪出游

門稀剝啄掩風林空谷跫然喜足音俗事相干休挂齒  
常談可聽且虛襟爐深紫芋充朝膳髮禿黃花稱短簪  
生長太平殊自愧十年學道尚蓬心

倚冰附熱總難堪應接山林早細語何貴白衣稱宰相  
且尊黃面事瞿曇過來益覺清緣熟現在欣無惡業擔  
况有烟霞爲供養漫題公案話燒菴

大烹莫過菜根甜飯後温暾日滿簷棋陣縱橫權袖手  
詞家諧謔且掀髯點癡我輩原相半哀樂中年已益兼

此後優游寧過分不煩筮叟布著占

樵斤斫缺赦松杉日給爐薪不用芟寒坐雪窓光皎潔  
凜看冰瀑勢嶄崒探梅得路憑筇杖呵研供題憶茜衫  
莫把詩筒遍傳送怕君促迫報空函

詩餘

附

踏莎行

寄贈凌南樓時  
客大癡山房

曠蕩襟懷淒涼行止丈夫未遇嗟如此撥吟祇解掇珠  
璣謀身翻欲遺金紫水榭山窓陳經列史借人燈火  
探微旨風雲感會是何人後車不載奇男子

東風第一枝

游峽山用  
史梅谿韻

海粟集卷六  
三  
蔗雨晴初榆烟禁後晨光變做妍暖客邊些子閒愁與  
春較來非淺看人笑語喜路匝靡蕪青輦仗興來陟徧  
層岡抵暮權迴歡燕 百五日早驚轉眼山水趣旋開  
生面柳條遠帶鷗沙竹陰暗通鹿苑花梢零亂瞥冒了  
風鳶殘線莫近前翠盦羅衣濃態隔林遙見

海粟集卷第六

拾遺

余憶弱冠時即識雪坡顧先生於塔院時浮圖師  
伊目方學詩畫於先生余亦時時過從得聞緒論  
將修刺列名弟子會先生赴桐鄉汪氏請不果未  
幾以喪歸至今以爲恨甲辰乙巳間得交先生從  
子文寧因索讀海粟集而山居禱興三十首遺焉  
先是余從父恪菴寓塔院與先生爲友恪菴歿余  
理其笥得山居詩稿因檢歸文寧而先生之集始  
備先生畫竹在前代可與夏仲昭朱白民相頡頏  
人獲之不啻拱璧幾以此掩其詩故其集人亦尠  
問及文寧恐日久失傳惓惓焉以表彰家學爲已



任因以所藏書畫售人剗行世俾余較其魯魚  
至其詩之工已詳於曹王兩公序余無庸復贅文  
寧他日必持此詩一帙酒一壺拜先生之墓且酌  
且焚而告以刻是詩之緣起先生未必不大笑於  
九京也時庚戌夏日後學馬旦拜手謹識



